

المقدّمة

على طول السنين، وملّي خلق الله العالم، كان كيتعامل مع الناس من خلال الأنبياء باش يوريّ لهم الإرادة دياّله و باش يتصالح معهم، وبشحال من طريقة وريّ لنا الله المحبّة والغفران دياّله، وأعطى لنا أكثر من فرصة باش نتعرّفو عليه.

في كل واحدة من هد القصص الّي في يديك دابا كاين شي دليل على الحاجات الّي وقعو د بالصّح فحال: النجاة د سيدنا نوح والعائلة دياّله من الطوفان، الأمانة د الله مع العبد دياّله يوسف والمرتبة الّي وصله لها حتّى ولى الحاكم على مصر كاملة، سيّدنا موسى الّي جرّب القوّة د الله ملّي نجّى الشعب د بني إسرائيل في الصحراء، وبلا مانهدرو على داوود، إبراهيم... وأنبياء آخرين ومن الحياة د هدوك الناس أعرفنا الصفات د الله شويّة بشويّة ولكن في المجّي د سيّدنا يسوع المسيح الّي ورّى لنا الله المحبّة دياّله فيه، أعرفنا الله ميّة في الميّة، حيت جى ومات من أجلنا وأعطى لنا أكثر حاجة نقدر نطلبوها الّي هي الحياة الأبديّة. وبها نقدر نعيشو بالأمل والسلام .

1: كيفاش خلق الله الدنيا

تكوين 1-2

في اللّول خلق الله الدنيا. خلق السماء والأرض، النهار والليل، خلق النباتات والزرع، النجوم، القمر، الحوت، الطيور والحيونات كاملين. وشاف الله بلي كل الشّي آلي خلقه مزيان بزّاف وباركّه .

وقال الله: "نخلقو بني آدم في الصورة ديانا"، وهكذا خلق الله آدم من التراب ونفخ فيه الحياة وقال: "ماشي مزيان يكون بوحديتّه"، وخلق له واحد المرأة آلي سمّاها آدم "حواء"، وعاولد تاني شاف الله بلي كل الشّي آلي خلقه مزيان بزّاف وباركّه. وفي النهار السابع أرتاح الله من كل الشّي آلي عمله وبارك ديك النهار وقدره .

- ملي كنتأملو في الكون كنشوفو العظمة د الله في كل حاجة فيه.

- الله ورّى لنا المحبة ديانله ملي خلقنا في الصورة ديانله ووجد لنا كل حاجة يمكن نحتاجوها.

- الله خصّص النهار السابع نالراحة وقدره. حتّى حنا خصّنا نخصّصو الوقت نالله.

2: آدم و حواء في الجنة

تكوين 3

كان آدم وحواء كيعيشو في واحد الموطع في الأرض
إسمه جنة عدن، الّي كان الله وصّاهم من قبل باش
يگابلوها وقال لهم: "تقدرو تاكلو من الشجار كاملين الّي
في الجنة من غير الشجرة د معرفة الخير والشرّ. النهار
الّي تاكلو منها تموتو". وأعطى لهم السلطة على كل
المخلوقات، ولكن الشيطان ما عجبو شي الحال على ديك
الشّي تسيف في الصورة د الحيّة، ومشى عند حواء وقال
لها: "واش د بالصّح الله قال لكم ما تاكلو شي من حتّى
شجرة من الشجار الّي في الجنة؟" وفي ديك الساعة
جاوبتها حواء وقالت: "لا، الله قال بأننا نقدرو ناكلو من
الشجار كاملين من غير الشجرة د معرفة الخير والشرّ إذا
كلينا منها عنموتو". وبقي عليها الشيطان حتّى زيّعها
وقال لها "بالعكس عتولّيو فحال الله وعتقدرو تميّزو بين
الخير و الشرّ".

زاغت حواء وكلات من الشجرة الّي كان منّهم الله ياكلو
منّها وأعطات حتّى نراجلها آدم، وفي ديك الساعة تفتحو
العينين ديالهم وكتاشفو بلي هم عريانين، حشمو بزّاف
ومشاو خيطو بالوراق د الشجار الحوايج وتغطّاو بهم.
شويّة وهم يسمعو الصوت دالله كيعيط نادم وكيصقّصيه
فاين أنتين؟ وهو يجاوبه: "انا مخبّع حيت عُريان"،
وصقّصاه الله: "باش عرفتني؟ واش كليتي من الشجرة الّي

وصيّتك ما تاكول شي منها؟"، جى آدم لصقها في مرائه
وقال نالّله: "المرأة الّلي عطيتيني هي الّلي زيّغتني"، وحوّاء
قالت "الحية هي الّلي زيّغتني". وفي ديك الساعة لعن الله
الحية وقال لها: " أنتين والمرأة عتكونو عديان والسلالة
ديال المرأة عتقضي على السلالة دياك وعتزطم على
راسك وأنتين عتزطم له على رجله"، وقال نحوّاء: " أنتين
عتولد بالحريق وراجلك هو الّلي عيحكم عليك"، ولعن
الله الأرض بسباب آدم وقال له: " دابا خصك تخدم بالعرق
ديالك باش تعيش، وفي الآخر عتموت". وهكذا طردهم
الله من الجنة.

- الله أعطانا كل الشي آلي كحتاجوه، بلحاق خصنا نتحمّلو المسؤولية على كل حاجة كنعملوها.
- الشيطان هو العدو ديالنا على ديك شي خصنا نرودّو بالنا معاه.
- حنا ديمّا كنحمّلو المسؤولية د الأخطاء ديالنا نالناس آخرين.
- المعصية كتبعّدنا من الله على ديك شي خصنا نطيعو الله باش نقربو منه.
- المحبة د الله كتبان فالوعد آلي أعطالنا ملي قال عيصيفط ولده باش يخلصنا
- الوعد د الله كيباين في المحبة ديالّه ملي قال عيصيفط آلي عيقضي على الشيطان ويخلصنا آلي هو المسيح.

3: قايين و هابيل

تكوين 4

دازت الأيام وولدت حواء الولد اللؤلؤ وسمّاه " قايين " وولدت الثاني وسمّاه "هابيل". وكان هابيل سارح أما قايين كان فلاح وفي واحد النهار أعطى قايين واحد العطيّة نالّهُ من الغلّة د الأرض دياّله وهابيل أعطاه من أحسن البقار الّتي كانت عنده، وهكذا رضى الله على التقدمة د هابيل ورفض د قايين، في ديك الساعة تعصّب قايين بزّاف وما عجبو شي الحال، وهو يهدر معه الله وصقّصاه: "يا قايين علاش معصّب؟ كُكونتي أعملت الخير كُكونتي فرحان دابا"، وتنهّى الله عليه وقال له: "ردّ بالك من الأفعال دياالك". حيث الله كان كايعرف القلب ديال قايين، وفي واحد النهار ملّى كان قايين كيتمشى مع خاه هابيل في الخلا، شبر قايين وقتل خاه هابيل، وملّى عيّط له الله وصقّصاه وقاله: " قايين فاين هو خاك هابيل؟" جاوبه قايين وقال: "واش أنا العسّاس دياّله؟" وردّ عليه الله وقال له: " شني أعملت يا قايين؟ الدم دخاك كيغيّط لي من الأرض، من هد النهار ما عتبقى الأرض تعطيك الغلّة وعتبقى ديماً هربان حياتك كاملة"، ومن مور ديك الشّي مشى قايين نواحد الأرض بعيدة و تزوّج فيها وولد بزّاف د اللولاد .

- الله كيعرف شنّو في القلب د كل واحد فينا .
- خصّنا نرودّو بالنّا من الغيرة والحسد حيث يقدرّو يفرّقونا على الله .
- الله كامل وكيبغي الكمال في العطايا الّي كنعطيوها.
- الخطيّة كنورتوها من الوالدين ديالنا الّي هم آدم وحوّاء.
- ما نقدرّو شي نتغيّرو من غير إذا خدم فينا الله.

4: نوح

تكوين 5-9

من بعد ما مات هابيل رزق الله آدم وحواء بواحد الولد أخور إلي سمّاه حواء، "شيت"، إلي المعنى دياله هبة الله، كان شيت واحد الراجل مزيان بزاف وكانت السلالة دياله مباركة و هو إلي جى من السلالة دياله أخنوخ ونوح إلي كان الراجل الوحيد إلي متقى الله في الأرض في ديك الوقت. نوح هذا كانو عنده ثلاثة د العواول: سام ويافت وحام.

مع الوقت شاف الله بلي القلوب والأفكار د ديك الناس إلي ما كيعبدوه شي، وعرف النية دياهم. على ديك الشئ قرّر الله يفني الأرض كاملة، وهكذا طلب من نوح باش يبني شي سفينة وقال له: "كنعاهدك أ نوح أنتين والعائلة دياك بلي ماغديشي تموتو. ودابا خصك تبني واحد السفينة كيفما عنقولك باش تنجاو من الطوفان". طاع نوح الوصية د الله وبقي كيعدّل ديك السفينة شي 100 عام.

وملي وجد نوح السفينة دخل فيها جوج من كل نوع د الحيوان، ذكر ولنتى وسبعة د جوجات من كل الحيوانات إلي حلال والمأكلة دياها وديالهم، ودخل حتّى هو والعائلة دياله نالسفينة: نوح ومراثة وولادهم، سام وحام ويافت والنساء دياهم. وهكذا شدّ الله عليهم الباب د السفينة وبدأت كتطيح الشتاء كيفما كان قالهم حتّى تفتحو ببيان د السماء كاملين وغرق الفيضان الأرض كاملة،

وبقات الشتاء كتطيح أربعين يوم حتّى تغطّي كل الشي بالماء وما نجّى حتّى واحد من غير الّلي كانوا في السفينة. ومن بعد 150 يوم صيِّفُط الله واحد الريح قويّة وهكدا بدات الأرض كتيبس ومن بعد 3 شهور عاد قدرت العائلة د نوح تشوف الجبال، ومن بعد 40 يوم صيِّفُط نوح واحد الغراب باش يشوف واش الأرض يبسات، ولكن ديك الغراب رجع خاوي وهكدا عرف نوح بلي باقي الأرض ما يبسات، ومن بعد صيِّفُط الحمامة ووالو، ومن بعد سيمانة عاود تاني صيِّفُطها وهد المرّة جات بالورقة د الزيتون في فومها. ديك الساعة عرف نوح بلي الأرض يبسات، وملي كّازت سيمانة عاود تاني وصيِّفُط الحمامة، ولكن هد المرّة ما رجعت شي. وفي ديك الساعة هدر الله مع نوح وقال له: "نوح تقدر تخرج دابا أنتين وعائلتك". وملي خرجو من السفينة كيفما قال لهم الله وباش يشكر نوح الله عطاه شي ذبيحة وحرّقها بالعافية قدامه وفرح به الله بزّاف. وقال الله في قلبه: "ماعمرني نعاود نفني الأرض بالماء مرّة أخرة حيث بني آدم مزروعة فيه الخطيّة من الوقت الّلي عصاني آدم، وقال نوح مرّة أخرة:

"نوح، عمّر الأرض باللولاد، وماعمري نعاود نقضي على الأرض مرّة أخرة". وورّى له العلامة د العهد ديالّه معاه فقّوس قزح وقال له: "ملي تشوفه تفكرني وتفكر العهد دياتي معاك".

- نوح طاع الله وخی الناس كاملين في الأرض ما طعوه شي، على ديك شي ما خصنا شي ندوها في الهدرة د الناس، ندوها غير في الهدرة د الله.
- التقة الي كانت عند نوح في الله والصبر والطاعة دياله، هم الي نجأوه من الطوفان وحتى حنا إذا تقنا في الله وصبرنا وطعناه اكيد عينجينا.
- في الحياة ديماً عيكونو عندنا المشاكل ولكن مزيان ما نزرבו شي ونصبرو حتى يخرجنا الله منها ويعطينا الحل.
- ملي نخرجو من المشاكل يكون مزيان إذا قدما نالله الدبائح د الشكر و التسبيح والحمد حيث كيفرح بيها بزاف.
- الله بين العلامة ديال العهد دياله مع الإنسان في قوس قزح وهد الشي خصه يخلينا نبقاو تابتين وتايقين في الله ديماً حيث هو إله أمين.

5: برج بابل

تكوين 11

من بعد الطوفان د نوح بقاو غير تمنية د الناس في الأرض، نوح ومرأته وسام وحام ويافت والنساء دياهم، وحام هدا هو بباه د كنعان. وفي واحد النهار هدر الله معهم وقال لهم: "عمرو الأرض باللولاد"، وديك الشّي الّي وقع من بعد ولّاو عندهم بزّاف د اللولاد. مّلي كازت الأيام بداو الناس كيتكبرو في الأرض وتافقو بيناتهم باش يبنيو شي مدينة ويسكنو فيها مجموعين باش ما يبقاو شي مشتتين ويعملو فيها شي برج عالي بزّاف يوصل حتّى نالسماء باش هكدا يولّيو مشهورين، وبدّو كيفتأخرو بديك الشّي الّي كيعلّمو، تمّا عرف الله النية دياهم وقال: "دابا كيقدرّو يعملو الّي بغاو حيث كيهدرّو بلغة واحدة، أرا نزلو ونبدّلو اللّغة دياهم ويرجعو هدا ما كيفهم أخور". وديك الشّي الّي كان، بدّل الله اللّغة دياهم وما بقى حتّى واحد كيفهم أخور، هكدا وقّفو البني د البرج و المدينة حيث حتّى واحد ماكيفهم أخور شنو كيقول وتسمّى ديك الموطع بابل حيث تمّا الله بلبل اللّسان دياهم كاملين وهيداك تفرّقو في الأرض.

- الله وقى بالوعد دياؤه مع نوح وولادّه ملّي عطى لهم بزّاف د اللولاد كيفما كان قال لهم.
- ما عمّر التكبر كيوصلنا نالله حيت ضدّ الطبيعة دياؤه.
- ملّي ما كيفهموشي الناس بعضهم هد شي كيخليهم يتفرّقو.

6: مَلِي عَيْطَ اللَّهِ نَأْبِرَام

تكوين 11-12

في الجيل الثامن مور سام كان عند واحد الراجل إسمه تارح ثلاثة د الولاد: "أبرام" ألي هو براهيم، "ناحور" و"حاران". تزوّج حاران وولد ولد سمّاه لوط وبنت سمّاه ملكة. أمّا ناحور تزوّج ببنت خاه، وأبرام تزوّج بساراي ألي هي سارة، ألي كانت ختّه من باباه، وفي واحد النهار أقترح تارح على العائلة دباله باش يمشيو يسكنو في أرض كنعان، ولكن في الآخر مشاو نسوريا، وبقاو فيها حتّى مات تارح. وفي واحد النهار وقف الله على أبرام وقال له: "أبرام، خصّك تخلي دابا بلادك وتمشي نلأرض ألي عنورك وعنرجّك واحد الأمة عظيمة ونباركك ونبارك الأرض بسبابك"، في ديك الوقت كان أبرام في عمره 75 عام. طاع أبرام الله ومشى هو ولوط ومراثه وحتّى الخدّامة دبالهم نلأرض كنعان فاين قال له الله. في ديك الوقت ما كان شي عند أبرام حتّى ولد حيت مراثه ساراي كانت عاكرة. من بعد طريق طويلة وصلو نشي مدينة مسميّة شكيم في الأرض كنعان دابا مسميّة نابلس وهيدا وقى الله بالعهد دباله مع أبرام وقال له: "هدي هي الأرض ألي واعدتك بها، من هد النهار عتولّي دبالك" وأوّل ما عمّل أبرام باش يشكر الله بنى له واحد المذبح فاين يبقى يعبدّه ديمًا.

- الطاعة والصبر كيجيبو البركة لنا ونالناس آلي معنا.
- خصّنا ضروري نتيقو في الوعد د الله بلا مانشفوه
- حيث الله كيقول: "سعدات آلي أمن بيّا بلا ما شافني".
(يوحنا 20:29).
- خصّنا ديمًا نخطو العبادة د الله في الدرجة اللوى.

7: أبرام في مصر

تكوين 12

في واحد الوقت كان الجوع في أرض كنعان كاملة وهكذا
فكر أبرام باش يمشي هو والعائلة دياره نمصر. وملي
وصلو قال أبرام نسايا: "أنتين مزيونة بزاف
والمصريين إذا شافوك عيقولو هديك مراته وعيقتلوني
ويخليواك، على ديك الشئ قول بلي أنتين ختي". ود
بالصح ملي شافوها المصريين قالو مع بعضهم: "واش
شفتو ديك المرأة شحال مزيونة؟" ومشاو شكروها نالملك
بزاف وأمرهم باش يجيبوها له نالقصر دياره وكان
فرحان بها بزاف، وأعطى بزاف د كادوس نابرام، أش
من بقار، غنم، حمير، جمولة وأعطاه حتى الخدّمات باش
يخدموه. ولكن الله صلّط الأمراض على القصر د الملك
بالسبة دساراي حيت هي مرأة مزوجة، ديك الشئ الي
خلّى الملك يدور في أبرام ويقول له: "شنّي هد الشئ الي
عملت لي؟ علاش خبعتي عليّا بلي ساراي مراتك وقلت
لي بلي غير هي ختك؟ صافي، أدّيها من قدامي ومشيو
أنا ما عندي ما نعمل بيها"، ووحي هيداك وصّى الملك
عليهم الرجال دياره باش يوصلوهم فاين مابغاو. ورجع
أبرام والعائلة دياره نكنعان وخلاهم يدّيو معاهم كل الشئ
الي أعطى لهم الملك .

- قلة الإيمان ديالنا هي اللي كتجيب لنا المشاكل
وكتعطّل الخطّة دالله نحياتنا وديك الشّي اللي كيخلّينا
نطّيحو في المنكر ونظلمو الناس آخرين معنا .
- وحيّ كنخطّاو، الله ديماً كيتدخل باش يغفر لنا
ويخرّجنا من المشاكل.

8: الفراق ديال أبرام مع لوط

تكوين 13

رجع أبرام ولوط والعائلة ديالهم نلأرض كنعان، وهم لاباس عليهم، وعندهم بزّاف د الكسيبة. ديك الشّي ألّي خلق المشاكل بين الخدّامة د أبرام والخدّامة د لوط حيث الربيع والماء ما كانو شي كيكفاو نالبهايم، وهيدا بداو السّراح ديالهم بجوج كيدابزو بيناتهم .

من بعد، طاحت على أبرام واحد الفكرة، وأقترحها على خاه لوط وقال له: "لوط، بلا ما نبقاو ندّابزو على الأرض حيث حنا خوت، والأرض راها كبيرة. خلّينا نفرّقو كل حاجة عندنا، أدّي أنتين الأرض ألّي بغيتي، وأنا ندّي ديك الشّي ألّي بقى".

وملّي شاف لوط في الأرض د الأردنّ عجباته بزّاف، حيث ربيع ديالها كان مزيان، وفيها الماء وفضلها على الأرض أخرة ألّي كانت يابسة وما فيها شي الماء.

وقال لوط نأبرام: "أنا كنفضّل الجوايه د الأردنّ". وهكذا ولّات العائلة ديالّه كاملة ساكنة قريبة من بلاد "سدوم". وسدوم هدي كاينة حدا البحر الميّت وكان معروف على الناس د تمّا بلّي قباحين بزّاف.

أمّا أبرام، بقى ساكن غير في أرض حبرون، وهكذا تفرّقو لوط وأبرام .

- الطمع كيفرّق حتّى بين الخوت إذا ما كان شي الله هو المركز ديالنا في الحياة .
- القناعة كتقرّبنا من الله وهكذا كيعوّضنا ديمًا على الّلي ضاع منّا.
- يكون مزيان اذا فكّرنا في الخير نأخرين قبل ما نفكّرو في راسنا.

9: العهد د الله مع أبرام

تكوين 15

في أرض حبرون، الله هدر مع أبرام من خلال واحد الرؤيا وقال له: "يا أبرام، ما تخاف شي، أنا هو اللّقاية ديالك، والأجر ديالك عظيم". جاوبه أبرام وقال له: "يا ربّي، شنو عتطيني، وأنا ما كنولد شي وما عندي الّي يورتنّي من غير الخدّام ديالي الدمّشقي؟"

جاوبه الله وقال له: "لا، يا أبرام، ماشي الخدّام ديالك الّي عيورتك. ما عيورتك غير الّي عيخرج من الدمّ ديالك. يا أبرام، شوف في السماء وحسّب النجوم الّي فيها إذا قدرت! أولادك عيكونو قدّ ديك النجوم". وفي ديك الساعة آمن أبرام بديك الهدرة وهكذا حسبّه الله بريء. وقال له: "أبرام خصّك تكون متأكد بلي التريكة ديالك عتغرب ويكونو عبيد 400 عام، وديك اللّامة الّي رجّعتكم عبيد أنا عنزل الحكم ديالي عليها، والتريكة ديالك عتخرج لابس عليها من ديك العبودية، وأنتين عتموت طرانكيل مع راسك و تتدفن في بلادك و التريكة ديالك عترجع مور 40 جيل نهنا، حيت الذنوب د الشعب الأموريين باقي ما وصلو نالحدّ ديالهم.

وفي ديك النهار أعمل الله عهد مع أبرام، وأعطى أرض كنعان نولاده.

- "المستحيل عند الناس ساهل عند الله". (لوقا 18:27)
- قبل ما نجيو نهد العالم، الله أعمل خطّة نالحياة د كل واحد فينا.
- الله عنده خطّة لينا كاملين، وكيخلي الاختيار في يدنا إما نقبلو ولا نرفضو.
- الله عادل في الحكم دياله وأمين في الوعد دياله.

10: الفكرة د ساراي

تكوين 16

كَازَتْ عَشْرَ سَنِينَ مَوْرَ الْوَعْدِ الّٰي كَانَ أُعْطِيَ اللهُ نَآبْرَامَ،
وَسَارَايَ بَاقِيَ مَا وَلَدَتْ شَيْ. وَمَا صَبَرَتْ شَيْ وَجَاتَهَا وَاحِدَ
الْفِكْرَةِ، وَأَقْتَرَحَتْهَا عَلَى أَبْرَامَ رَاجِلَهَا وَقَالَتْ لَهُ: "يَا أَبْرَامَ،
عَلَّاشَ مَا تَدْخُلُ شَيْ بِالْخَدَامَةِ دِيَالِي الْمَصْرِيَّةِ "هَاجِرَ"
عَلَى اللَّهِ يَرْزُقْنِي مِنْهَا بَشِي وَلَدٌ؟".

حَيْثُ هَدَى كَانَتْ الْعَادَةُ عِنْدَ النَّاسِ فِي دَيْكَ الْوَقْتِ، وَعَمَلُ
أَبْرَامَ بِالْهَدَرَةِ دِيَالَهَا وَخَى اللَّهُ كَانَ وَاعَدَهُ بَلِّي عَيْرِزْقَهُ
بَشِي وَلَدَ مِنْ سَارَايَ وَدَخَلَ أَبْرَامَ عَلَى هَاجِرَ وَحَمَلَتْ مِنْهُ
بَوْلَدَ. وَفِي وَاحِدِ النَّهَارِ جَاتِ سَارَايَ كَتَشَكِي نَآبْرَامَ
وَكَتَقُولُ لَهُ: "دَنُوبِي عَلَيْكَ، مَلِّي حَمَلَتْ هَاجِرَ وَلَيْتَ
صَغِيرَةً فِي الْعَيْنِينَ دِيَالَهَا، اللَّهُ يَخْلُصُكَ".
جَاوَبَهَا أَبْرَامَ وَقَالَ: "هَاجِرَ الْخَدَامَةِ دِيَالِكَ، أَعْمَلُ فِيهَا الّٰي
بَغَيْتِي".

وَهَكَذَا بَقَاتِ سَارَايَ كَتَعَدَّى عَلَى هَاجِرَ حَتَّى هَرَبَتْ.
وَمَلِّي كَانَتْ هَاجِرَ هَرَبَانَةً فِي الصَّحْرَاءِ تَلَاقَهَا مَلَكَ دِ
الرَّبِّ وَقَالَ لَهَا: "فَايْنِ مَشَّى يَا هَاجِرَ؟"
رَدَّتْ عَلَيْهِ وَقَالَتْ: "أَنَا هَرَبَانَةً مِنْ مَوْلَاتِي سَارَايَ".

وَقَالَ لَهَا الْمَلَكَ: "مَشِي، رَجِعْ نَعْنِدَ سَارَةَ وَسَمِعَ الْهَدَرَةَ
دِيَالَهَا، حَيْثُ فِي الْمُسْتَقْبَلِ عَيْكُونُو عِنْدَكَ بَزَّافَ دِ الْوِلْدَادِ،
وَعَتُولَدَ وَلَدَ وَتَسْمِيهِ إِسْمَاعِيلَ، حَيْثُ اللَّهُ سَمِعَ الْبِكِي

ديالك. ولكن هو عيكون عدواني بزّاف و عيّدابز مع الناس ديمًا، خصوصاً مع خوثّه".
وهكذا رجعت هاجر عند مولاتها ساراي، ومن بعد ولدت ولد كيفما قال لها الملاك. وهيدا سمّي أبرام ولده "إسماعيل"، الّي كيّعني، "الله كيسمع"

- ملي كنتگلو على راسنا وما كنخليو شي كل الشّي في يد الله، خصّنا نتحمّلو النتيجة.
- الوقت د الله ماشي فحال الوقت ديانا، على ديك الشّي خصّنا نستتّاو الوعد ديالّه حتّى يتحقّق في الوقت ديالّه، ما نتعطلو ما نزربو.
- وخی حنا كنغلطو، الله ديمًا كيتدخّل باش يصلح الغلط ديانا وما كينسنا شي.

11: الله كياكّد العهد ديالّه مع أبرام

تكوين 17

كّاز وقت طويل، وفي واحد النهار ظهر الله نأبرام وقال له: "أنا الله القدير، سمع نالهدرة ديالي. من هد النهار عيولي إسمك "إبراهيم" آلي كيمني "الآب ديال بزّاف د الناس". وعنعمل العهد بيني وبينك وبين أولادك. أنا هو الله ديالك والله ديالهم. أرض كنعان عتكون ديماً ديالكم. والعلامة د العهد آلي عتكون بيني وبينكم هي الطهارة. على ديك الشّي خصّك تطهّر كل ذكر في الدار ديالك. ملّي يكون عنده فعمره تمنيام نفوق. وحتّى أمراتك من هد النهار عيولي إسمها "سارة"، وعنرزقها بواحد الولد وعتسميه إسحاق".

ولكن إبراهيم طاح على وجهه وبدى كيضحك في نفسه وقال: "ما تنسى شي يا ربّي، تبارك حتّى ولدي إسماعيل".

وقال له الله: "يا إبراهيم، أنا عنبارك حتّى إسماعيل، وعنعطيه بزّاف د لولاد، أمّا سارة عتولد لك ولد، وعتسميه إسحاق، والعهد ديالي عيكون بيني وبينه".

وفي ديك الوقت، مشى إبراهيم وطهّر كل ذكر عنده في الدار، منهم إسماعيل، والخدّامة آلي كانوا عنده. و كان إبراهيم في عمره ديك الساعة 99 عام ملّي تطهّر، وإسماعيل في عمره 13 عام.

- الله بوحديثه الّٰي يقدر يغيّر الطبيعة ديالنا. على ديك الشّي خصّنا نتيقو غير فيه.
- الله ديمًا أمين وصادق معنا وخّي كنغلطو في حقّه، غير خصّنا نتوبو على الخطية ونعملو بالوصيّة دياله فحال إبراهيم.
- الخطّة والإرادة د الله فوق من ديك الشّي الّٰي كنتصورو والّٰي بغينا .

12:الضياف الثلاثة

تكوين 18

في واحد النهار كان الصهد بزّاف في مدينة حبرون، وهو يعلي إبراهيم عينه قدام باب د القيطون دياه وهو يشوف ثلاثة د الرجال واقفين قدامه. مشى كيجري عندهم وقال لهم: "أجيو دخلو ترتاحو عندي شوية. وأنا عنجيب لكم الماء باش تغسلو الرجلين دياكم، وتاكلو شوية د الخبز باش تعتقو راسكم ومن بعد كمّلو الطريق". ومشى إبراهيم بالزربة وقال نمرأته: "سارة، عجن لنا شي خبز دغياً" ومشى عاود تاني وقال نواحد الخدام دياه باش يذبح شي عجل، وفي ديك الساعة مشى الخدام باش يعمل اللي قال له إبراهيم، وهكذا نزل إبراهيم كل الشّي اللي كاين باش ياكلوه. جاو هم صقصاواه: "فاين سارة؟" جاوبهم إبراهيم وقال: "في القيطون". وقال له واحد فيهم: "خصّك تعرف، يا إبراهيم، بلي قبل ما نرجع عندهك العام اللي المايجي، عتكون سارة ولدت لك شي ولد".

وفي ديك الساعة كانت سارة كتصنّت عليهم مور الباب وملي سمعت ديك الهدرة، بدات كتضحك في نفسها، وقالت مع راسها: "واش حتّى شرف إبراهيم، وكمل 99 عام؟"

وتما قال الله نابراهيم: "علاش كتضحك سارة؟" واش كاينة شي حاجة مستحيلة على الله؟"

وفي ديك الساعة خافت سارة بزّاف ونكرت، وقالت في الحين: "لا، ما ضحكت شي". جى الله جاوبها وقال : "لا، ضحكتي".

- مزيان تضيّف الناس ما كتعرفهم شي كيفما ضيّفو بزّاف د الرجال د الله الملائكة.
- حتّى حاجة ما مستحيلة أولا صعبية على الله. خصّنا غير نتيقو فيه.
- نقدر و نكدبو على الناس، وحتّى على راسنا، ولكن ما نقدر و شي نكدبو على الله حيث هو كيعرف كل حاجة علينا.

13: إبراهيم كيتشفّع من أجل مدينة سدوم؟

تكوين 18

مَلّي بغاو ديك التلاتة د الضياف الّي كانو عند إبراهيم يمشيو فحالهم، خرج معهم باش يسلم عليهم. وفي ديك الساعة قال الله نابراهيم: "القباحة والدنوب د الناس د سدوم زادت بزّاف، على ديك الشّي عنهبط نلأرض، ونعاقبهم على فعائلهم".

جاوبه إبراهيم وقال: "يا ربّي، واش عتقضي على الناس الّي متقيين والي ماشي متقيين؟ إدا كاين يا ربّي غير 50 واحد متقي في سدوم واش عتقضي على الناس كاملين؟ قال له الله: "لا، يا إبراهيم، إدا كاين فيهم غير 50 واحد متقي ماغديشي نقضي على الناس الّي في سدوم".

وقال إبراهيم عاود تاني: "وإدا كاين فيها غير 45 واحد متقي، واش عتقضي على البلاد كاملة؟" وجاوبه الله: "لا، يا إبراهيم، وخّي غير 45، ما عنقضي شي عليهم". وزاد إبراهيم: "وإدا كاين 40 د الناس، أولا غير 30 ، ونقولو 20...". عاود جاوبه الله " لا، عنسمح لهم".

وهيدا خاف إبراهيم عندك يتعصّب عليه الله وقال له: "يا ربّي، ما تعصّب شي عليّا، ولكن إدا كانو غير عشرة د الناس مزيانين؟"

وقال له الله في الآخر: "وخّي يكونو غير عشرة مزيانين، بالسبّة ديالهم عنغفر ناخرين الّي ماشي متقيين". على

سبابهم، ماغديشي نقضي على سدوم. وملّي كمّل إبراهيم
الهدرة ديالهُ مع الله رجع نالقيطون ديالهُ في حبرون.

- بسبب الناس الّي متقيين، وخّى يكونو قلالين، الله
كيرحم الناس الّي ماشي متقيين.
- في كل وقت خصّنا نتشفّعو من أجل الناس الّي باقي
ما كيعرفو شي الطريق د الله حيث هو ما بغى شي
يقضي عليهم.
- ما عمرنا نعيّاو ولا نملّو من الصلوات ديالنا نخوتنا
وحتّى من أجل الناس آخرين.

14: التطليلة د الملائكة على سدوم

تكوين 19

في واحد العشية من العشيات، دخلو جوج د الملائكة نالمدينة سدوم، وتمّا تلاقاو لوط الي كان كالس في باب ديالها. وملّي شافهم، ناض وسجد على الركبة ديالّه في الأرض وقال لهم: "أجيو، الله يخليكم، أسيادي تباتو عندي هذ الليلة في الدار دياتي". جاوبوه: "لا شكراً، آ سيدي، حنا عنباتو هذ الليلة غير على برّا".

ولكن لوط بقى كيرغبهم بزّاف، وكبيرز عليهم باش يمشيو يتعشاو عنده حتّى قبلو. والمشكل هي في ديك الليلة، جاو الناس ديك المدينة كاملة من الصغير حتّى نالكبير وبداو كيغيّطو على لوط وكيقولو له: "آ لوط، خرّج لنا ديك الضياف الي عندك. حنا بغينا نّعسو معاهم! حيت الناس ديك مدينة كانو طاغيين، إوا في ديك الساعة تعصّب لوط بزّاف، وشدّ الباب عليهم وقال لهم: "ما تعملو شي شي حاجة خايبة حيت هد الرجال ضياف عندي".

وبقاو كيغوّتو على لوط، وكيهرّسو الباب عليهم ولكن الملائكة حيت كانو في ديك الوقت مع لوط نجّاواه منهم وأعماوهم وما بقاو كيشوفو والو. حيت كانو الناس في ديك المدينة فاسدين.

وقالو الملائكة نلوط: "خرج دابا مع العائلة ديالك من نهنا، حيت الله عيقضي على هد المدينة".

- بالتضييفة ألي ضيّف بها لوط الملائكة عرف بلي الله
بغى يقضي على سدوم، وهكذا نجى هو والعائلة
دياله.
- إذا شوفنا الله صابر علينا وخي حنا خاطيين هد
الشي ما خصّو شي يخليّنا، نظنّو بلي الله راضي
علينا.
- الله كيكمّل النبؤات دياه والحكم دياهه وخي يبانو لنا
معطلين.

15:مَلِيّ قَضَى اللّٰهُ عَلَى سَدُومَ

تكوين 19

مَلِيّ طَلَعَ الْفَجْرَ، عَيَّطُوا الْمَلَائِكَةَ نَلُوطَ وَقَالُوا لَهُ: "شَنَّى بَاقِي كَتَسْتَنَّى؟ يَا لُوطَ، خَرَجْ مِنْ هَذِهِ الْبِلَادِ بِالزَّرْبَةِ".

وَلَكِنْ أَلِيَ وَقَعَ مِنْ بَعْدِ، لُوطُ وَالْعَائِلَةُ دِيَالَهُ مَا سَخَاوْ شَيِّ بِدِيكَ الْمَدِينَةَ وَمَا بَغَاوْ شَيِّ يَخْرُجُو مِنْهَا. عَلَى دِيكَ شَيِّ شَبَّرَتِ الْمَلَائِكَةُ فِي الْيَدِ دَ لُوطَ وَخَرَّجَاتُهُ بِالزَّرْبَةِ مِنْ سَدُومَ. وَوَاحِدٌ مِنَ الْمَلَائِكَةِ قَالَ لَهُمْ: "مَشْيُو دَغِيًّا نَالِجِبَلِ، وَعِنْدَكُمْ تَوَقَّفُو، أَوْ لَا تَشُوفُوا مَوْرَاكُمَ".

جَاوَبَهُمْ لُوطُ وَقَالَ: "شُكْرًا بَزَّافِ، يَا رِجَالَ اللَّهِ حَيْثُ نَجَّيْتُونَا، وَلَكِنْ خَايَ اللَّهُ، خَلَّيُونَا نَكْلَسُو غَيْرَ فِي دِيكَ الْمَدِينَةِ الصَّغِيرَةِ".

قَالَ لَهُ الْمَلَاكُ: "وَحَيَّ، غَيْرَ مَشْيُو، وَبَسْبَابِكُمْ مَا عَنَقَضِي شَيِّ عَلَى هَذِهِ الْمَدِينَةِ، وَلَكِنْ دَغِيًّا!" وَمَلِيّ طَلَعَتِ الشَّمْسُ، عَادَ وَصَلَ لُوطُ نَدِيكَ الْمَدِينَةَ، وَهَيْدَا تَدْمَرَّتْ سَدُومُ بَلِّي فِيهَا، وَمَاتُوا النَّاسُ كَامِلِينَ، بِالْعَافِيَةِ أَلِيَ نَزَّلَهَا اللَّهُ عَلَى سَدُومَ مِنَ السَّمَاءِ.

وَهَيْدَا تَفَكَّرَ اللَّهُ إِبْرَاهِيمَ وَنَجَّى لُوطَ وَالْعَائِلَةَ دِيَالَهُ، وَلَكِنْ مَرَاتُهُ دَ لُوطَ مَا نَجَاتِ شَيِّ حَيْثُ عَصَاتِ الْوَصِيَّةِ دَ اللَّهُ، مَلِيّ دَارَتْ بَاشَ تَشُوفَ مَوْرَاهَا. وَعَلَى دِيكَ الشَّيِّ بَقَاتِ مَجْمَدَةً فَحَالَ الْعَمُودُ دَ الْمَلَاكِ.

وفي النهار الثاني مع النبّوري، إبراهيم شحال بقى واقف
كيتمعن في سدوم، وهو كيشوف في الدخان الي طالع من
كل جهة.

- بعض المرّات كنبيعو شي حاجات وخی الله ما
راضي شي عليهم . ومزيان إذا خلّيناه هو الأوّل في
حياتنا.

- شي مرّات الله كيخرّجنا بزّز من الموطع الي ماشي
مزيان إذا ما بغينا شي نخرجو بخاطرنا.
- الي غلط كيستحقّ العقوبة. وهد الشّي الي وقع مع
المرأة د لوط الي عصات الوصيّة د الله.

16: الخلق د إسحاق

تكوين 21

من قبل الله كان واعد إبراهيم وقال له: "عنباركك وعتتبارك الأمم كاملة ببيك وبولادك". ومشات أيام وجات أيام، وبقاو إبراهيم وسارة كيتسناو الوعد الّي أعطى ليهم الله يتحقق. وملي كان إبراهيم عنده 100 عام ومراثه عندها 90 عام، عاد رزقهم الله بالواحد الولد، الّي سماواه "إسحاق". الّي فرحت به سارة بزّاف وقالت نابراهيم: "شكون كان كيقول بلي حتى نشرف عاد عنولد ونرطع"، وبالفرحة عملو له واحد الزردة كبيرة.

- وحي تطول الأيام، الوعد د الله لازم يتحقق.
- البركة د الله ماشي غير لنا بوحدنا، ولكن حتى نالناس الّي دايرين بينا.
- الله كي عمل المعجزات في حياتنا، وهد الشي ماعنده حتى علاقة بالسنيين ديالنا.

17: إمتحان آلي عمل الله إبراهيم

تكوين 22

دازت الأيام وكبر إسحاق ولد إبراهيم من سارة، وبغى الله يعمل واحد الإمتحان إبراهيم، وقال له في واحد النهار: "إبراهيم، جيب ولدك إسحاق، ولدك الوحيد، آلي العزيز عليك، وأديه نلأرض مريًا، وقدمه لي ذبيحة تمًا في الجبل آلي عنورك".

وهيدا ناض إبراهيم في نبوري، وأدى معه حتى جوج من الخدّامة آلي عنده، وولده إسحاق. وجمع الحطب باش يحرقه في الموطع آلي أمره به الله.

وفي النهار التالت، قال إبراهيم نالخدّامة: "بقاو أنتم هنا أنا وإبني عنمشو نعبدو الله ونجيو". وهو ماشي نديك الموطع سقصاه إسحاق:

"بابا ها العافية والحطب ولكن فاين هو الحولي آلي عندبحو؟" ردّ عليه إبراهيم وقال: "الله يجيب الحولي آ ولدي".

وملّي وصلو نالموطع آلي قال له عليه الله، بنى إبراهيم المذبح، وتمّا ربط ولده إسحاق، وعمله على المذبح آلي فيه الحطب. وملّي شبر إبراهيم الموس باش يذبح ولده، عيط له واحد الملاك د الله من السماء وقال له: "آ إبراهيم، ما تمدّ شي يدك على ولدك إسحاق، وما تعمله والو، حيث دابا عاد عرفت بلي كتخاف من الله. ملّي ما حيدت لي شي ولدك".

وملّي هزّ إبراهيم عينه، شاف واحد الحولي مشبّر القرون
ديالّه في الشجرة، وذبحه فعوط ولدّه إسحاق.

- الله كيجرّب الإيمان ديانا بشحال من حاجة باش
يعرف واش كنبيغواه هو الأوّل ولا شي حاجة أخرة.
- الطاعة ديانا نالله هي الّي كتجيب لنا البركة.
- كيفما مات الحولي فعوط إسحاق هيداك مات المسيح
في الموطع ديانا.

18: المرأة الّتي اختار الله ناسحاق

تكوين 24

دازت الأيام وشرف إبراهيم وبغى يزوّج ولده إسحاق قبل مايموت، على ديك الشّي في واحد النهار عيّط نالخدّام ديالّه ووصّاه باش يختار له شي مرأة ناسحاق، ولكن بالشرط ما تكون شي من الكنعانيين حيت كانو كيعبدو ألهة آخرين. وهكذا طلب إبراهيم من الخدّام ديالّه باش يسافر نواحد المدينة مسميّة حاران فاين كتسكن العائلة ديالّه، وصيفط معاه بزّاف د كادّوس، والصدّاق د العروسة، وجمولة نالبت الّتي ممكن تكون من النصيب د إسحاق.

طاع الخدّام الهدرة د إبراهيم ومشى نحاران. وملّي وصل أدّى الجمولة ديالّه باش يشربو من واحد البير، ووقف ودعى الله وقال له: "يا ربّي ورّيني شّي خصّني نعمل، ها أنا واقف حدا هد البير د الماء، والبنات د هد المدينة كاملين كيخرجو يسقيو الماء من هنا، يا ربّي البنت الّتي عنقول لها أعطيني نشرب، وتقول لي أرا نشرب حتّى الجمولة دمالك، هي الّتي عتكون أخترتي ناسحاق". وقبل ما يكمل الخدّام الهدرة ديالّه جات واحد البنت مسميّة "رفقة". كانت بنت مزيونة بزّاف، وماعمرها ما عرفت شي راجل من قبل، وكانت هزّي واحد الكربة د الماء فوق أكتافها وماجّي تسقي الماء. ومشى العبد كيحري عندها وقال لها: "أعطيني نشرب شوية د الماء" جات

هي قالت له: "هاك أشرب أسيدي"، ومشات بالزربة
وأعطات له يشرب، ومشات عاود تاني كتجري وشرّبت
الجمولة ديالّه. ديك الساعة عرف الخدّام بلّي هي المرأة
الّي اختار الله ناسحاق ومشى خطبها له من والديها الّي
كانو فرحانين بزّاف.

- أي خطة نفكرو فيها خصّها تكون على حسب الإرادة
ديال الله.
- ملّي كنعملو الإرادة د الله هي الأوّلى، الله كيحفض
حياتنا.

19: يعقوب و عيسو

تكوين 25

تزوَّج إسحاق برفقة ودوّزو وقت الطويل بلا عواول
حيث كانت عاكرة، وخی هاكداك بقى إسحاق كيصلّي
نالله حتّى أستاجب نالصلوات ديالّه، ورزقهم بالتوام وقبل
ما يخلقو هدر الله مع رفقة وقال لها: "في كرشك جوج د
الأّمات وتمّا عيتفرقو جوج د الشعوب واحد عيكون قوي
و أخور عيكون عبده". دازت الأيّام وولدت رفقة التوام
الأول سمائه "عيسو" و الثاني "يعقوب". وكانت العادة
ديالهم تمّا الكبير د الخوت هو الي كيدي البركة د باباه
كاملة. وكان عيسو عزيز على يعقوب بزّاف، حيث كان
راجل بدراعّه، ولكن رفقة كان عزيز عليها يعقوب أكثر
حيث كان آخر العنقود. وفي واحد النهار جى عيسو من
بزّا فيه الجوع بزّاف، وملي دخل جبر يعقوب كيطيّب
الماكلة. وقال له عيسو: "أعطيني شوية د الماكلة حيث
كنموت بالجوع"

جاوبه يعقوب: "وخی بشرط تعطيني البركة ديالك"
ديك الساعة ردّ عليه عيسو وقال: "أنا كنموت بالجوع
وما عندي ما نعمل بها، غير أدّياها"
و باش يتأكد يعقوب قال له: "أحلّف لي بلي أعطيتها لي".
ديك الساعة أحلّف له عيسو وهاكدا تخلّى على البركة د
باباه مقابل العدس والخبز حيث ما قدر شي القيمة دياها.

- شحال ما طال الزمن ولا قصر، الله عيستاجب
نالصلوات ديالنا، ولكن في الوقت دباله، على ديك
الشّي ما عمّرنا نياسو.
- ما خصّنا شي نفرطو في البركات د السماء باش
نربحو الكنز د الدنيا حيت فاني.

20: الحيلة د رفقة و يعقوب

تكوين 27

كبر إسحاق وما بقى شي كيشوف مزيان، وفي واحد النهار عيَّط نعيسو وقال له: "أنا كبرت بزّاف و ما عرفت شي فوقاش نقدر نموت، مشي دابا صاد لي شي حاجة من الخلا، وطيب لي ديك الشّي ألّي كيحبني، وجيبه لي ناكله باش نعطيك البركة ديالي قبل ما نموت". وفي ديك الساعة كانت رفقة كتصنّت عليهم وسمعت كل الشّي. ومشات عيَّطت نولدها يعقوب ألّي عزيز عليها بالزربة، وطلبت منه يجيب شي حاجة تطيبها له دغيا قبل ما يجي خاه باش هكدا هو ألّي يدي البركة د باباه، وحيث عيسو كان صُردي، شبرت رفقة ولّبت يعقوب الجلدة د المعز، وعطّات له الماكلة يديها نبابه، وهكدا أدّى يعقوب الماكلة نبابه .

في الأول شك إسحاق في يعقوب ولكن ملّي حدى له يده وجبره صوردي تاق به، وأكل من ديك الشّي ألّي طيب له و أعطاه البركة دياله وقال له: "الله يعطيك، يا ولدي، الخير في الأرض، ألّي عمره ما يتقاضى. وتخدمك قبائل والشعوب، وتكون السيّد على خوتك ويركعو لك وألّي يلعنك يتلعن، وألّي يباركك يتبارك".

وملّي جى عيسو طيب ديك الشّي ألّي صاده وأداه نبابه، ولكن ملّي هدر مع كتاشف عرف بلي يعقوب

ضحك على باباه وسرق له البركة دياؤه. وفي ديك
الساعة بقى عيسو كيبيكي بزّاف حيث باباه ما يقدر يعمل
والو باش يرجعه البركة دياؤه، وتعصّب على خاه
وكرهه، وفكّر يقتله، على ديك الشّي هرب يعقوب وخوى
البلاد.

- ماشي مزيان نستغلّو النقطة د الضعف د شي واحد
باش نوصّلو نالهدف ديانا.
- كيقول المتل الي عمل الدنب كيستاهل العقوبة

21: الحيلة د لابان مع يعقوب

تكوين 28-29

هرب يعقوب نهاران المدينة الي كتعيش فيها العائلة د ماماه باش ما يقتله شي خاه، حيث سرق له البركة دياه. وملي قرب نواحد البير سقى على خاله فاين كيسكون، وتمّا تلاقى ببنت خاله راحيل، وملي وصلته نالدار عاود نخاله كل الشّي الي وقع، ديك الساعة درّعه وقال له: "أنتين من لحمي ودمي" وخلاه معه. ودازت الأيام وسقى لابان يعقوب وقال له: "أنتين كتخدمني فابور شحال بغيتيني نخلصك؟" جاوبه يعقوب وقال له: "بغيتك تزوّجني ببنتك الصغيرة راحيل". وهكذا أتافقو بيناتهم باش يخدم 7 سنين فابور معه ويعطي له بنته راحيل، ولكن لابان ضحك عليه وفي الليلة د الدخلة أكتشف يعقوب بلي لابان أعطاه بنته الكبيرة ماشي راحيل، وملي واجه خاله قال له: " في العادة ديانا ماشي مزيان تتزوّج الصغيرة قبل الكبيرة، دوّز معها غير سيمانة ومن بعد نزوّجك براحيل، ولكن بشرط تخدم 7 سنين أخرة فابور". وديك الشّي الي عمل يعقوب، من بعد سيمانة زوّجه خاله براحيل وهكذا زاد خدم يعقوب 7 سنين أخرة فابور. يعقوب بغى راحيل أكثر من ليئة وحي ما كانت شي كتولد، وملي شاف الله بلي ليئة ماشي مقبولة عند يعقوب، أعطاها بزّاف د اللولاد، وديك الشّي الي خلق الغيرة بين راحيل وليئة وخلي راحيل تتعصب بزّاف

ومشأت طلبت من راجلها ينعس مع الخدّامة ديالها بلهة
حيث كانت عندهم العادة الولد الي كتولده الخدّامة كيولي
ولدها. وهكذا ولدت لها جوج د اللولاد، وملي عرفت
راحيل بلي ما تقدر شي تولد مرّة، طلبت عاود ثاني من
يعقوب ينعس مع الخدّامة ديالها أخرة زلفة، وولدت لها
حتّى هي جوج د اللولاد، ولكن في الآخر الله حنّ على
راحيل ورزقها بجوج د اللولاد الي هم يوسف و بنيامين.

- مزيان نكونو معقولين مع الناس وما نعملو شي
الحيلة معهم عندك ترجع ضدّنا.
- إذا بغينا نوصّلو نالهدف ديالنا ضروري تكون عندنا
الإرادة باش نضحّو بأكثر من حاجة من أجل الناس
الي كنّبغيو.

22: يعقوب كيولي عنده إسم جديد

تكوين 32

ملّي كبر يوسف قرّر باباه يعقوب يرجع نمدينة دياّله، هو وعائلته نالمدينة الّي فيها خاه الّي هرب منه شحال هدي عندك يقتله. وما وصل يعقوب نواحد الواد حتّى كان طاح الليل، على ديك الشّي قرّرو يباتو تمّا. وفي ديك الليلة، بقى يعقوب بوحدّه وهو يجي نعنّده واحد الملاك، وبدى كيّدابز معاه، وملّي مابغاشي يعقوب يطلق منه، ديك الساعة شبّر الملاك الفخدة د يعقوب حتّى خرّجله العظم من موطنه. وخّى هايداك بقى يعقوب مشبّر فيه وكيقول له: "ما غديشي نطلقك حتّى تباركني"، ود بالصّح ما طلق يعقوب الملاك حتّى باركّه، وقال له: "من دابا نفوق عيولي إسمك "إسرائيل" ماشي يعقوب، حيث قدرتي تتواجه مع الله والناس"، وملّي طلع الصباح مشى إسرائيل مع العائلة دياّله وهو كيخرج، وملّي تلاقى خاه الّي كان هربان منه، أسجدله سبعة د المرّات، حيث كان خوفان عندك يقتله، ولكن عيسو ما عملّه والو، بالعكس درّعه وباسّه. وبداو كيبيكو بجوج بيهم، وهكدا أعطى يعقوب الّي هو إسرائيل نخاه عيسو من البركة الّي أعطاه الله وخّى بزّز باش أقبلها منه، وهكدا بقى ساكن إسرائيل مع عائلته في واحد المدينة مسميّة كنعان.

- كيفما قدر الله يبدّل الإسم نيعقوب قادر يبدّل حياتنا.

- الله كيوصّينا نسمحو نبعضياتنا، كيفما سمح عيسو نخاه يعقوب.
- يكون أحسن إذا قسمنا البركات الي أعطانا الله مع خوتنا.

23: الحيلة الي تعاملات نيوست

تكوين 37

ولد إسرائيل ولد ملي كان كبير في العمر وسمّاه يوسف، على ديك الشّي كان عنده عزيز على أولاده آخرين، وهذ الشّي الي خلق الغيرة بيّنه وبين خوتّه، وخلي هم يفكّرو في شي حيلة باش يتهنّاو منه. من بعد حلم يوسف جوج د الحلمات وعاولدهم نوالديه ونخوتّه، وهكدا زادو كرهوه أكثر من الأوّل حيث عرفو من الحلمات بلي عيكون عنده السلطة عليهم. وفي واحد النهار ملي مشاو خوتّه د يوسف يرعاو الغنم على برّا، طلب إسرائيل من ولده يوسف باش يمشي يشوفهم واش لابس عليهم. ومشي كيفما طلب منه هو لابس واحد القندورة خيطها له باباه بيده. وملي شافوه خوتّه وهو ماجي من بعيد، بداو كيهذرو بيناتهم وكيفكرو في شي حيلة باش يتهنّاو منه حيث فكرو بلي هديك هي الفرصة الي عندهم. وقالو بيناتهم: "ها هو مول لحلمات ماجي يلاه نقتلوه، ونسيّيوه في البير ونقولو نبابانا بلي شي وحش كلاه، ونشوفو الأحلام دياله فاين عتتفعه". ولكن خاه راوبين عزّ عليه يوسف بزّاف وأقترح عليهم باش يسيّيوه في البير، وديك الشّي الي عملو، ولكن من بعد دازت واحد القافلة من الإسماعلين وأقترح عليهم يهودا يبيعوه لها، من غير راوبين حيث ما كان شي معاهم. وفي الآخر باعو خاهم يوسف نديك القافلة بعشرين بياسة د النقرة، وأداو

القندورة دباله ووسخوها بالدم د المعزة باش يوريوها
نباباهم ويقولوله بلي شي وحش كلاه، حزن راوبين
بزاف حتى قطع حوايجيه ملي عرف بلي باعو خاهم
يوسف، وملي وصلو نالدار قالو نباباهم بلي شي وحش
كلاه، حزن إسرائيل على يوسف مدة طويلة، وملي كانو
كيجيو الناس يعزواه ما كان شي كيبيغي يتلاقهم حيث كان
صعيب عليه يتقبل بلي ولده يوسف مات.

- يمكن الله يتكلم معنا بشي رؤيا ولا حلم كيفما عمل
مع يوسف والناس آخرين.
- الغيرة والطمع هم الي كيفرقو العائلات وكيجرّنا
نالذنوب.

24: يوسف والباطل الي طاح عليه

تكوين 39

وصلت القافلة الي شرات يوسف نمصر، وباعته نواحد القايد د المحكمة تما، مسمي فوطيفار. وفوطيفار هدا ملي شاف بلي يوسف واحد الراجل معقول ود التيقه، تهلي فيه بزاف ورجعه هو المسؤول على كل الشئ الي في الدار دياله. وهكذا تبارك الفوطيفار والدار دياله بالخدمة الي كان كي عملها يوسف حيث الله كان معاه في كل حاجة كان كي عملها. يوسف كان ولد مزيون بزاف، ولكن نهار مور نهار المرأة د فوطيفار كانت كتخط عليه عينها، وفي واحد النهار طلبت منه باش ينعس معاها، ولكن هو رفض وجاوبها: "لا، كيفاش نقدر نخون الله والسيد الي فتح لي داره وما حيد لي حتى حاجة من غيرك حيث أنتين مراته". ووخي هكداك ما ياست شي وبقات كل نهار كتحاول معاه، وفي واحد النهار شبّرت المرأة د فوطيفار يوسف وجرته بالقوة، وملي فلت منها وهرب نبرا، بقات القندورة دياله في يدها، وما رضات شي وبدات كتغوت حتى تجمعو الناس الي في الدار وكدبت وأتهمته بلي دخل عندها وحاول يتعدى عليها. وملي جى راجلها قالتها له، تعصب راجلها بزاف من يوسف، ودخله نالحبس.

- إذا مَجَّدنا الله في حياتنا، ماشي غير كيباركنا، كيبارك حتّى الناس الّلي دايرين بنا.
- دَيْماً الشيطان كيبيغي يطِيحنا في الخطيَّة وكيطمِّعنا بشحال من حاجة كيفما عمل مع يوسف ولكن فشل حيث الله كان معاه.
- إذا تغلَّبنا على الخطيَّة هد الشّي ما كيغني شي بلي الله عيباركنا في الحين، ولكن أكيد في الوقت دياله.

25: التفسير د الحلمات في الحبس

تكوين 40-41

دازت أيام طويلة ويوسف باقي في الحبس، ولكن يد الله ديمًا كانت معاه، وكل ما أعمله في الحبس كان كينجح، حيث الله كان عارف بلي هو بريء. وكانو دخلو في الوقت دياله شي جوج د رجال معاه، الي كانو خدامين مع الملك. وحلمو شي حلمات وفسرهم يوسف ومن بعد تحققو كيفما كان قال لهم، حيث الله كان عطاء هد الموهبة د تفسير الأحلام.

ومن بعد شي عامين حلم الملك شي حلمات وطلب من الحكماء الي عنده يفسرو له ديك الحلمات، وحتى واحد ما قدر يفسرهم، وملي سمع الساقى د فرعون ديك الشى مشى نعهده وقال له: "أنا كنعمل ملي كنت دخلتني نالحبس أنا وواحد الراجل حتى حنا كنا حلمنا شي حاجة وكان تما في الحبس معنا شي واحد اسمه يوسف وفسرلنا الحلمات ديانا وتحققو كيفما قال لنا". وفي ديك الساعة صيفط فرعون مور يوسف نالحبس، وعاوله الحلمات دياله وفسرهم له يوسف وقال له: "ماجي سبع سنين د الخير في مصر، ولكن سبع سنين الي موراها عيكون الجفاف"، على ديك الشى نصح يوسف الملك باش يشوف شي راجل حكيم باش يگابل هد الأمور. وظهر نالملك بلي ما عيجبر شي أحسن من يوسف نديك الخدمة، على ديك الشى رجعه هو مسؤول على مصر كاملة. والطاعة د

يوسف نالّله هي الّلي خلّاته مقبول عند فرعون حتّى
أختاره من بعد يولّي الملك الثاني د مصر، ويشوف فيه
واحد الراجل الّلي يقدر يعتق الشعب ديالّه من الجوع،
حتّى رجع واحد الراجل مهم في مصر.

- حتّى الملوك كيحتاجو نالناس الّلي عندهم الموهبة من
الله.
- كل موهبة أعطاهّا لنا الله، هي بركة لنا ونالناس
آخرين.
- ما نخليو شي الظروف تخسّر العلاقة ديانا مع الله
والناس، ولكن نخليو الثقة ديانا ثابتة في الله.

26: العائلة د إسرائيل كترحل نمصر

تكوين 42

جى الوقت دالجفاف كيفما كان قال يوسف نالملك د مصر، وولات العيشة صعبية في أرض كنعان، ديك الساعة قرّر يعقوب يصيفط ولادّه نمصر باش يشريو الشعير وقال لهم: "علاش كتشوفو في بعضكم؟ سمعت بلي كاين الشعير في مصر، يلاه مشيو نتّمّا وشريواه باش ما نموتو شي بالجوع". ومشاو عشرة د خوئّه د يوسف نمصر باش يشريو الشعير من غير بنيامين حيت باباه كان كيخاف عليه بزّاف من بعد ما خسر ولده يوسف. وملي وصلو ولاد يعقوب نتّمّا، وقفو قدّام يوسف حيت هو الي كان المسؤول على كل الشّي في مصر، و سجدولّه بوجههم نالأرض، وملي شافهم يوسف عرفهم بلي خوئّه، وتنكّر باش ما يعقلوه شي، وأتّهمهم بلي هم جاو باش يتجسسو عليه، وقال لهم: "أنتم جواسيس وأنا ماغديشي نخليكم تمشيو حتّى تجيبو خاكم الصغير". وديك الشّي الي عملو وحيّ يعقوب تردّد بزّاف حيت خاف عندك ما يرجع شي فحال الي وقعلو مع يوسف. وفي الآخر ما قدر شي يوسف يصبر و أعترف لخوئّه بلي هو خاهم يوسف الي باعوه، في الأوّل خافو من ردّة الفعل دباله بزّاف، ولكن وحيّ ديك الشّي كامل الي دوزو عليه سمح لهم يوسف، وقال لهم: "أنتم نويتو الشرّ، ولكن الله قصد الخير".

وصيفط معاهم كل الشّيّ الي كيحتاجو، وملّي عاوّد خوثّه
د يوسف نباباهم يعقوب الي وقع فرح بزّاف، وشويّة
ويعقوب يشوف شي ناس صيفطهم له يوسف موراه باش
يعيش معاه.

- ماعمرنا مانردّو الشرّ بالشرّ، يكون أحسن إذا سمحنا
نعضياتنا.
- عمرها الكلمة د الله ما كتطيح نالأرض، بالعكس
كتحقّق في الوقت ديالها.
- الله كيستعمل حياتنا باش يبارك الناس ويمجد إسمه
في كل موطن ولكن بالإرادة دياله.

27: بني إسرائيل عبيد في مصر

خروج 1

هدي أكثر من 400 عام فانت، والعائلة ديعقوب باقى
كتعيش في مصر، من سبعين واحد حتّى ولّات التريكة
ديالّه واحد الشعب كبير. مات يعقوب ومات موراه
يوسف وخوئّه كاملين، حتّى جى واحد العام الّى حكم
على مصر واحد الملك ما كيعرف شي يوسف وكان
واحد الملك ماشي مزيان، ما كيحمل حتّى شعرة في بني
إسرائيل على ديك الشّي بدى كيوصّي الشعب ديالّه باش
يتعدّاو عليهم ويعطيولهم الخدمة الصعبة باش يموتو،
حيث كان كيخاف يزيديو يكترو ويتقلبو عليه وعلى
الشعب ديالّه. ولكن شنّو ما عمل كانو الإسرائيليين كيبقاو
يزيدو، وهكذا ديك الملك كيزيد يتعدّى على الشعب د الله
"إسرائيليين" ورجّعهم عبيد حتّى ولّاو كيترجّاو الله كل
النهار باش ينجيهم.

- ماعمرنا نتفاجؤ إذا عملنا الخير ورجع لنا بالشر.
- بالمشاكيل الّى كندوزو منها الله كيكبر الإيمان ديانا
وكيباركنا أكثر.
- ماعمرهم الخوت كيكونو عديان ولكن الشيطان
كيستغلّ النقطة د الضعف ديانا باش يحقق الهدف
ديالّه.

28: الخلق د موسى

خروج 2

كان الشعب الله كل نهار كيزيد يكبر، وهد الشّي خلى فرعون يزيد يطغى ويأمر باش يتّقتل كل ذكر خلق في الشعب د بني إسرائيل، وكان الله كيسمع نالغوات د الشعب دياله كل النهار. وكانت عنده واحد الخطّة باش ينجيهم، وفي ديك الوقت تزداد واحد الولد في مصر مسمّي موسى، الّي خبعتّه ماما 3 شهور حيت خافت عندك يقتله فرعون. وملي بدى كيكبر شويّة ما قدرت شي تزيد تخبعه أكثر. على ديك الشّي عدّلت له واحد القفّة د القصب وعملته فيها، ونزلتها في الحافة د الواد، ووصّات أخته باش تردّ بالها عليه. وفي ديك الوقت كانت نزلت بنت فرعون والخدمات دياها نالواد، من بعد شويّة شافت بنت فرعون ديك القفّة وطلبت من الخدّامة دياها تجيبها لها، وملي فتحتها جبرت واحد الولد صغير كيبكي، وعزّ عليها بزّاف وهكدا قرّرت تربيّه. وملي شافتهم أخته د موسى مشات كتجري نعد بنت فرعون وقالت لها: "واش نمشي نعيّطلك على شي مرأة من العبرانيات باش ترضّعك هد الولد؟"، جاوبتها وقالت: "وخى، أدّيه رضّعه وأنا نخلّصك"، وهكدا بقى موسى مع ماما حتّى كمل الوقت د الرضاعة دياله، ومن بعد جابته بنت فرعون باش يعيش معها في القصر فحال

ولدها وهي آلي سمّاته موسى، وكانت هدي الإرادة د الله
باش ما يموت شي موسى وهو صغير.

- حتّى واحد ما يقدر يتدخّل في الإرادة د الله، حتّى
الشيطان وخي يعمل آلي عمل حيت الله قدير.
- الله ديماً كيسمع نالصلوات ديانا، خصوصاً في
الوقت د الضيق إذا كان القلب ديانا عمر بالإيمان.

29: الهروب د موسى من مصر

خروج 2

مشات أيام وجات أيام وكبر موسى وولّى راجل ووخى ربّته بنت فرعون فحال ولدها، ما عمّره ما نسي الأصل دياله، وبلي هو ماشي مصريّ. في واحد النهار خرج يشوف شنو واقع مع خوته وكيف هم، وهو ماشي، شاف واحد الراجل مصريّ كيضرب واحد الراجل عبرانيّ من خوته، وهكدا جاتّه النفس عليه وملّي دار وما شاف حتّى واحد كيشوفه، شبر وقتل ديك الراجل المصريّ، ودفنه في الرمل. وفي النهار الثاني شاف عاود ثاني واحد جوج د الرجال عبرانيّين كيذبزو وملّي قال نالراجل الّي فيه الفلطة فيهم علاش كتضرب صاحبك؟ جاوبه وقال له: "شكون رجّحك قاضي علينا؟ واش كتفكر تقتلني كيفما قتلتني المصريّ؟" في ديك الساعة خاف موسى بزّاف و عرف بلي صافي تفضح وقرر يهرب خصوصاً ملّي عرف بلي حتّى فرعون ساق الخبر وطلب باش يقتل. وهكدا هرب موسى وسكن في أرض مديان، وتمّا تعرّف على واحد البنت وتزوّج بها، الّي بقى خدام مع باباها سارح 40 عام.

- ضروري من بعد الإيمان ديانا نردّو البال نخوتنا،
نعاونوهم ونشجعوهم.

- إذا كان عندنا أولي عند خوتنا شي مشكل، عمّرنا ما نستعملو القوّة ديانا، بالعكس نعتمدو غير على الله بوحده، باش ما نزيدو شي نعقدو المشكل.
- إذا ما أعملنا شي الإرادة د الله في حياتنا، خصّنا نردّو بالنا، حيث أكيد الله عيربينا بشي طريقة آلي يمكن تكون صعبية وطويلة.

30: الشجرة الّتي فيها العافية وما كتحرقشي

خروج 3

واحد النهار ملّي كان موسى كيرعى الغنم، شاف واحد المنظر غريب، ضهرلّه الله في وسط واحد العليقة معمّرة بالعافية وما كتحرق شي. وقال في نفسه: "يقرب يشوف كيفاش الشجرة فيها العافية وما كتحرق شي"، وملّي قرب هدر معاه الله وقال له: "موسى ما تقرب شي نهنا، حيد الصنظلة ديالك، حيت الموطع الّتي واقف عليه أرض مقدّسة"، وزاد قال له: "أنا الله د باباك، الله د إبراهيم وإسحاق ويعقوب"، وخبرّه الله بلّي هو كيشوف كل الشّي الّتي وقع نبي إسرائيل وبلّي اخترّه هو باش ينقد الشعب ديالّه، ولكن موسى في الأول خاف بزّاف ورفض. من بعد الله شجّعّه وقال له: "أنا عنكون معاك"، وقال له عاود تاني بلّي ماشي غير عيخرّج بني إسرائيل من مصر، لا عيمل شي معجزات الّتي تخلي المصريين همّ الّتي يخرجوهم .

- الله كيتحكّم في حياتنا كاملة، كيفما كيتحكّم في الطبيعة.

- إذا كنّا مقدّسين كيكون الله معنا وفينا وهكدا كيقدر يهدر معنا ببزّاف د الطرق.

- الله وخی قادر یعمل کل الشّی بوحده، کیبغی یستعمل
حیاتنا علی دیک الشّی خصّنا نکنونو واجدین نالخدمة
دیالّه، إدا کنا ضعافین ولا قویّین.

31:العقاب د الله نفرعون

خروج 7-10

هدر الله مع موسى وأمره باش يمشي نعد فرعون هو وخاه هارون من ماماه، وقال الله نموسى: "أنا رجعتك إله على فرعون وخاك نبى، أنتين عتقول كل الشى اللى عنقلك، وهارون عيمشي يهدر مع فرعون باش يطلق بني إسرائيل، ولكن أنا عنقصح القلب د فرعون، وعنعمل المعجزات غير باش يعرفو المصريين بلى أنا هو الله".

طاعو موسى وهارون الهدرة د الله، وهدرو مع فرعون أكثر من مرّة كيفما قال لهم الله، ولكن فرعون ما حشم شى، على ديك الشى سلط الله عليه وحتّى على المصريين 10 د المصيبات ووخى هكداك والو ما بغى يتوب على الأفعال دىاله، وكان كل مرّة كيكذب الهدرة د موسى وهارون، ولكن فى المرّة العاشرة قال هارون نفرعون بلى هد المرّة الله عيقتل كل كبير فى العائلة المصرية وكل كبير فى الكسبية دىالهم، حتّى يوليوا يطلبو هم الموت". ووخى هد الشى كامل اللى عمله الله، باقى فرعون ما بغى يحشم وزاد فيه وبدى كيحكر الله، وأنسى بلى الله قادر يعمل المستحيل.

- ملى يطلب منا الله نعملو شى حاجة، خصنا نتيقو فيه ونعملوها وحنأ هانيين.

- ضروري في الخدمة د الله عندوزو من المشاكل، على ديك الشّي خصّنا نتيقو بّلي الله هو قادر يحمينا.
- ما نقدرو شي نتعكّسو نالخطّة د الله باش توقع، حيث الله قدير.

32: الخروج د بني إسرائيل من مصر

خروج 12

الكلمة د الله ما عمرها ما كتطيح نالأرض!
زاد الله قصح القلب د فرعون، وكيفما كان قال موسى
بلي عيخرج في النص د الليل وعيقتل كل كبير في مصر
من الناس المصريين والكسيبة ديالهم، وأمر بني إسرائيل
باش يدبحو الحولي ويدهنو الحاشية فوقانية د الباب
بالدم، باش ملي يدوز ملاك الموت ويشوف الدم في
الحاشية فوقانية ديك الدار يخلف عليها، وما يقتل لا كبير
في الناس ولا في الكسيبة الي فيها و ينجاو، وديك الشّي
الي عملو بني إسرائيل، طبقو الوصية د الله بالحرف،
وهكذا ملي داز ملاك الموت قتل غير كل كبير في
المصريين وفي الكسيبة ديالهم، وهدوك الي بقاو منهم
تقهر و بزّاف، ورجعو هم كيبقّشو على موسى وكيرغبوه
باش يخرج و يخرّج بني إسرائيل من مصر.

- إذا تعكّسنا نالإرادة د الله عنتلّصو مزيان.
- الله قادر يحفضنا وحي نكونو في وسط الموت،
بشرط نطيعو الوصيّة ديالّه.

33: الله كيڳود بني إسرائيل في الصحراء

خروج 13 - 14

تحققت الإرادة د الله مّلي خرّج بني إسرائيل من مصر
كيفما كان واعدهم، وهكذا بقاو تابعين موسى وهارون،
وأداو معاهم كل الشّي الي يقدر و يحتاجو من المأكلة،
الكسيبة، وحتّى الخدّامة الديالهم، وبقاو ماشيين في
الصحراء ليل ونهار. في النهار كان كيمشي الله قدامهم
فحال واحد الصارية د السحابة باش يورّي لهم الطريق،
وفي الليل كان كيمشي قدامهم فحال شي صارية د العافية
باش يضوّي لهم الطريق. وملي وصل موسى والشعب
ديالّه نالجهة أخرة د البحر الأحمر باش يخيمو تما حتّى
يرتاحو ويكمّلوا الطريق، سمعو شي صوت د الخيولة
ماجي كيقرب عندهم، فديك الساعة عرفو بلّي فرعون
والعسكر ديالّه تابعينهم باش يتعدّاو عليهم عاود تاني،
وكيفما كان قال الله نموسى بلّي عزيز يقصّح القلب د
فرعون باش يعرفو المصريين بلّي هو الله وديك الشّي
الي كان.

شّني عيملو بني إسرائيل دبا؟ البحر قدامهم، والعدو
موراهم؟

- الله ديماً معنا، بالليل بالنهار، فكل وقت، إذن إذا كان
الله معنا شكون يقدر ياديننا؟ (رومية 8:31)

- إذا كانوا المشاكل دايرين بنا من كل جهة، خصّنا
نعلّيو عينا ونشوفو نفوق، تمّا عنجبرو الّلي ينقدنا
34: النجاة د بني إسرائيل من البحر و فرعون

خروج 14

خاف الشعب د بني إسرائيل بزّاف مّلي عرف بّلي
فرعون والجنود ديالّه موراهم، وما كاين فاين يهربو
حيث البحر قدّامهم والعدو موراهم. غوّتو على الله،
ودارو حتّى في موسى وقالو له: "واش ما كاينين شي
القبورة في مصر باش جبّتيننا نموتو هنا؟ كنفضلو نخدمو
عند المصريّين على نموتو في الصحراء". ديك الساعة
هدر الله مع موسى وقال له: "موسى هزّ العكّاز ديالك
وقسّم بيه البحر وهو عيتفرق على جوج، باش يقطعو
بني إسرائيل وينجاو". وديك الشّي الّلي وقع، تقسّم البحر
على جوج وبانت الأرض وبدّاو بني إسرائيل كيقطعو
البحر، ومّلي شافو بني إسرائيل المعجزة الّلي عمل الله
خافو بزّاف وأمنو بالله د موسى.

- مّلي نكونو غارقين في المشاكل، خصّنا نحمدو الله
ونشكروه على كل الشّي، والله أكيد عيحفّضنا.
- مزيان نتفكّرو ديك الشّي الّلي أعمل معنا الله من قبل،
ونشبّرو في الوعد ديالّه.
- بالطاعة ديانا نالّله، تقدر تكون عندنا الطريق في
الوسط د البحر.

35:مَلِي غَلَبَ اللهُ الْعَدُو

خروج 14

دازو بني إسرائيل كاملين والكسيبة دياهم في وسط البحر الأحمر فاين أتشَقّ .

الله كان عاهد بني إسرائيل بلي عينجيهم وها هو كيوفى بالعهد دياله معاهم حيث القوّة والعظمة دياله أكبر من كل الشّي وعاولد تاني خلاهم باش يشوفو معجزة أخرة بالعينين ديايهم ويأمنو بلي هو الإله الحقيقي وبلي هو الي كيتحكّم في كل الشّي.

ملي شافوهم العديان، الي هم فرعون والجيش دياله بغاوا يعملو فحالهم ويقطعو البحر من موراها باش يردّهم ويتكرفصو عليهم مرّة أخرة، ولكن الله ما كتخفى عليه حتّى حاجة، على ديك الشّي أمر موسى باش يمدّ يده ناحية د البحر مرّة أخرة ويرجع الماء كيفما كان، وديك الشّي الي عمل. وهكذا مات فرعون والجيش دياله كامل، أما بني إسرائيل كان العهد د الله معاهم حيث نجاهم كيفما واعدهم.

- الله هو هو، كيفما البارح كيفما اليوما عمره ما كيتبدّل.

- الإيمان كيخلينا نشوفو القوّة والعظمة د الله.

- الله كيعاقب كل واحد كيعصاه أولى كيتعدّى على الشعب ديالّه.
- الله عمرّه ما كيتبدّل وهو ديماً كايّن معنا، باش يحمينا حيت كيبيغينا.

36:الأمانة د الله مع الشعب دياه في الصحراء

خروج 16

خسارة ! بنادم هو بنادم، وخي عمل الله المستحيل باش ينجي الشعب د بني إسرائيل، مرّة أخرة نساو الله في أوّل ما حسّو بالجوع وبدّاو كيتشكاو كيفما العادة، وكيقولو موسى: "كون مُتنا في مصر أحسن من هنا، بعدا تمّا كنّا كناكلو حتّى كنشبعو، جيبّتنا حتّى نهنا باش تقتلنا بالجوع".

وخي هكداك الرحمة د الله معاهم كانت واسعة وكبيرة، وخي نساواه الله عاود تاني حنّ عليهم وشاف من حالهم، ونزلّ عليهم الخير من السماء، وهد الخير كان واحد الخبز خاصّ مسمّي "المنّ"، ووخي جبرو ما ياكلو عاود تاني بدّاو كيتشكاو بالعطش ومرّة أخرة الله رحمهم وخرّج ليهم الماء من الصخر، وهكدا كمّلو بني إسرائيل الطريق دياهم حتّى وصلّو نجبل سيناء، الموطع الي اختاره الله باش يكون موطع مقدّس خاصّ غير نالعبادة.

- شحال قبيح ينكر بنادم البركات الي كيعطيه الله.
- الله باقي كيرحمنا وكيسدّد الإحتياجات ديانا، وخي حنا كنساو العظمة دياه.
- الله ديمّا كيوقف معنا، وخي الطريق طويلة، هو عيبقى معنا حتّى نوصّلو.

37: شَنّو وقع في جبل سيناء؟

خروج 19-20

حتّى نفوقاش عيبقى موسى مكوّود الشعب د بني إسرائيل؟
وحتّى نفوقاش عيبقى يعلمهم ويصحّ الأخطاء ديالهم؟
هد الشّي كامل كان كيخرفو الله من قبل، على ديك الشّي
نزّل عليهم شي وصيّات، باش هكدا يعملو بالهدرة ديالّه
ويطيعوه حتّى نأخر نهار الدنيا، وباش يبقاو متحدّين مع
بعضهم وقويين في الإيمان ديالهم.

ملّي طلع موسى نجبل سيناء، أمرّه الله باش يقول نبني
إسرائيل يبقاو نتحيت حيت ديك الموطع مقدّس، وبلي
حتّى واحد ما عنده الحقّ باش يطلع نتّمّا، من غير موسى
وخاه هارون، وملّي طلع موسى وهارون نالجبل سمع
الشعب د بني إسرائيل واحد الصوت قوي من فوق
الجبل، كان الرعد والبرق والدخان كيغطيّو الجبل كامل،
وحتّى واحد ما قدر يشوف أولا يسمع شّي بغى الله يقول
نموسى، حيت الشعب كامل كان خوفان بزّاف.

- الخطة د الله الّي كيوجدّ لنا هي أحسن حاجة نحياتنا،
خصّنا غير نتيقو فيه.

- الله كيوجدّ لكل واحد فينا الخدمة الّي خصّه يعملها،
غير خصّنا نكونو واجدين لها.

- الله دَيْماً كيهدر معنا، على ديك الشّي خصّنا نميّزو الصوت دِيالْه ونسمعولْه.
- الله يقدر يهدر معنا بشحال من طريقة، منها الصوت د الرعد آلي كيورّينا القوّة والعظمة دِيالْه.

38: الوصيّات العشرة دالله نالشعب ديالّه

خروج 20

نزل الله عشرة د الوصيّات على الشعب د بني إسرائيل
آلي هي:

1: أنا إله مغيار، ما بغيت شي نشوفك كتعبّد شي ألّهة
أخرة من غيري.

2: ما تعدّل شي الأصنام في أي صورة كيفما كانت لا
في الأرض ولا في السماء ولا في الماء، وما تعبدها
شي.

3: ما تحلف شي بالإسم ديالي غير هكداك .

4: خلّي النهار د السبت ليالي، حيت السبت نهار مقدّس.

5: تهلّي في الوالدين ديالك، باش يطوال عمرك.

6: ما تقتل شي .

7: ماتزني شي.

8: ماتسرق شي.

9: ماتشهد شي بالزور.

10: ما تشهى شي المرأة د الجار ديالك ولا حتّى شي
حاجة أخرة ديالّه.

- الهدف د الشرع هو ينضمّ العلاقة ديالنا سواء مع الله
أولا الناس.

- الشرع د الله فحال شي شمعة آلي كتضوي لنا
الطريق مّلي كنكونو في الظلام.

- كيفاش كتقول بّلي كتبغي الله، وباقي كتكره خاك؟
حيث إذا كتبغي الله خصّك تبغي خاك وخّى يكون العدو
ديالك حيث الله محبة.

39: الشعب الخاين

خروج 32

بقى موسى في الجبل سيناء حتّى سمع الوصيّات كاملة
آلي عطى الله نالشعب د بني إسرائيل. ولكن خسارة!
حيث ملّي حسّو بلي موسى تعطلّ عليهم، مشاو كيطلبو
من هارون يعدّل لهم شي إله أخور يعبدوه، وهكذا مشى
هارون وعدّلهم واحد الإله أخور من الذهب على الصورة
د العجل حيث صدّعوله رأسه، وملّي رجع موسى تصدم
حيث جبر الشعب د بني إسرائيل مرّة أخرة أنسى الله
ومشى كيعبدّ واحد الإله د الذهب في الصورة دالعجل.
تعصّب موسى بزّاف حتّى هرّس واحد جوج د اللوحات
بالعصب وحرّق ديك العجل د الذهب، و وخی هد الشّي
كامل حنّ قلبه عليهم مرّة أخرة ورجع عند الله كيصلّي
وكيرغبه باش يغفرلهم .

- ملّي كيكون الشعب بلا قايد، كل واحد كي عمل ما
بغى.
- ما نخليو شي الملاهي د الدنيا تبعدنا على الطريق د
الله.
- ما نلومو شي الناس آلي بعادين على الله، بالعكس
نحنو عليهم، نهذرو معاهم، ونصلّيو من أجلهم.

40: التواجد نالدخول نأرض الموعد

عدد 13

كان الشعب د بني إسرائيل ديماً كيخطى وموسى كيمشي يتشفّع له عند الله، وأخيراً هد المرة تاب ورجع نالطريق د الله، وبدى كيسمع الهدرة د موسى، على ديك الشّي كان الله ديماً واقف معاهم .

و ملي قربو يوصلو بني إسرائيل نأرض الموعد هدر الله مع موسى وقال له : " يا موسى أختار شي رجال من الشعب إلي معاك وصيفطهم يتجسسو على ديك الأرض"، حيث كانوا شي ناس ساكنين في ديك الأرض. وهكذا طاع موسى الهدرة د الله، و أختار 12 راجل كيما قال له وصيفطهم، وقال لهم: " تجسسو مزيان على ديك الأرض وشوفو كيفاش عاملة الحالة د الشعب د ديك الأرض، واش قوي ولا ضعيف؟ والأرض إلي ساكنين فيها واش مزيانة؟ وشحال د الأرض ساكنين فيها؟"، وهكذا موسى طلب منهم باش يجيبه الخبر د كل الشّي إلي كيخصّ ديك المدينة، وديك الشّي إلي أعملو، طاعو الهدرة دياله ومشاو.

- إذا توبنا على الفعايل ديالنا، الله واجد ماشي غير باش يغفرلنا بالعكس واجد حتّى يباركنا .

- عمّرنا ما نخافو إذا كنّا ماشيين في الطريق د الله
حيث هو كيوجد لنا كل الشّي الّي كنحتاجو.
- قبل ما نبداو أي خدمة، خصّنا نعرفو شّي بغينا،
والّي عنحتاجو، ولكن أول حاجة نتيقو في الله.

41:التقة الناقصة في الله

عدد: 13-14

طاعو ديك 12 د الرجال موسى ومشاو يتجسسو على ديك المدينة كيفما أمرهم، وهكذا قدرو يشوفو كيفاش عاملة وكيفاش هم الناس ديالها، وملّي رجعو قالو نموسى: "الأرض مزيانة بزّاف فحال اللبن مع العسل، ولكن الناس الّي فيها قويين، والمدن عندهم محروسة مزيان، ما نقدرّو شي نطلعو نتّمّا حيت هم قويين علينا"، من غير واحد من ديك الرجال كان مسمّي كالب الّي قال: "وخى هكداك نقدرّو نطلعو نديك الأرض و نديوها حيت حنا قويين عليهم".

ولكن ديك 11 د الرجال أخريين بداو كيّدخلو الخوف في القلب د الشعب وكيفول له: "ديك الأرض مزيانة ولكن الناس ديالها صعاابين، وعاد طوالين بزّاف، وحنا كنبانو في عينهم فحال الجراد". وملّي سمع الشعب ديك الهدرة دخل في قلبهم الخوف وهكذا مرّة أخرة الشعب د بني إسرائيل ما تاقو شي في الله، ورفضو يدخلو للأرض الموعد. على ديك الشّي الله خلّصهم وبقاو في الصحراء 40 عام، عاد دخلو لأرض الموعد.

- أي خطوة بغينا نعملوها، خصّنا نتيقو بلي الله معنا
وكيخدم في وسطنا.
- يقدر يكون عندنا رأي واحد، ولكن النظرة د كل
واحد فينا كتختلف من واحد نأخور على حسب
الإيمان ديالنا بالله.
- خصّنا نتيقو في الصوت د الله، وما نخليو شي الهدرة
د الناس تأثر علينا وتزرع الخوف ديالهم فينا.

42: الحية د النحاس

عدد 21

مَلّي كان موسى والشعب د بني إسرائيل ماشين في الصحراء وخي كان الوقت الي كيدوزو صعيب، كان عندهم المنّ باش ياكلوه ولكن ما كانوشي فرحانين. عندهم المعزّي الي هو موسى، وخي هكداك ما كانوشي كيحسو بالسلام. وهكدا بدى عاود تاني الشعب د بني إسرائيل كيتشكي، وكيقول نموسى: "علاش جيبتيينا حتّى نهنا باش نموتو، فاين ما كاين لا خبز ولا ماء، وعاد طلعت لنا هذ المكلة في راسنا". مَلّي شاف الله بلي بني إسرائيل زادو فيه بزّاف عاقبهم وصلط عليهم الحياي مسمومين الي عضو بزّاف منهم حتّى ماتو، ديك الساعة عاد ندمو ورجعو كيطلبو السماحة من موسى وكيقولو له: "حنا خطينا مَلّي هدرنا عليك وعلى الله ماشي مزيان، عفاك صلي نالله باش يحيد هذ الحياي"، وهكدا صلي موسى، وأمره الله باش يعدّل واحد الحية كبيرة د النحاس، ويعلقها على شي راية، باش كل واحد عضّته شي حية غير يشوف في الحية د النحاس ماي موت شي، وديك الشّي الي كان، كل واحد كانت كتعضّه شي حية غير كيشوف في هديك الي معلقة كيحيى.

- شحال قبيح نكرو البركات والنعم الّلي أعطانا عطى
لنا الله.

- كيفما علّق موسى الحيّة باش نجّى الشعب د بني
إسرائيل الناس، هكدا حتّى المسيح تعلّق في الصليب
باش ينجى كل واحد أمن بيه.

- ماشي الشوفة في الحيّة هي الّلي نجاتهم، لا الثقة
ديالنا في الله هي بوحديتها الّلي تقدر تعطينا الحياة.

43: الحضور د الله في وسط الشعب

تنثية: 33-34

يشوع: 1-3

كأزت 40 عام وموسى والشعب دباله باقيين في الصحراء، وفي واحد النهار من ديك النهر كان غنى موسى الأغنية د الشكر والحمد نالله على المعجزات اللى عمل معاه، هدر معاه الله وطلب منه باش يطلع نفوق الجبل ويشوف من بعيد أرض الموعد قبل ما يموت، وديك الشئى اللى وقع، مات موسى كيفما قال له الله قبل مايشوفها، وهكذا أختار الله نالشعب د بني إسرائيل قائد أخور مسمى "يشوع" باش يكوّدهم حتى يدخلو نأرض الموعد، وقال الله نيشوع: " مشي نبلاد الأردن، كل موطن تما عنعطيه لكم، كيفما كنت قلت نموسى، أنا ديماً عنكون معاك كيفما كنت معاه، وحتى واحد مايقدر يغلبك"، وطاع يشوع الهدرة د الله وطلب من الشعب دباله يوجّد رأسه باش يسافرو من دابا 3 أيام، وديك الشئى اللى عملو.

- الله هو اللى كيختار شكون اللى يكوّود الناس المومنين.
- قلة الإيمان هي اللى كتخلينا نضيّعوا البركات د الله.
- قبل ما نبدأو أي حاجة كيفما كانت، نطلبو الحضور د الله باش نتباركو ويتمجّد الاسم دباله.

44:المعاونة درحاب نبي إسرائيل

يشوع 2

من بعد ما قطع يشوع والشعب د بني إسرائيل الواد الحامل، صيفط القائد يشوع جوج من الرجال الي معاه نالمدينة أريحا باش يتجسسو ويعرفو كل الشي عليها، وملي وصلو ديك جوج د الرجال نالمدينة دخلو نالدار د واحد المرأة زانية إسمها رحاب الي خبعتهم في السطاح د الدار ديالها باش ما يقتلوهم شي الناس د ديك المدينة. وفي ديك الساعة وصل الخبر نالملك وصيفط الخدمة دياله باش يبقشو عليهم في الدار ديالها، وملي صقصاوها عليهم، كدبت باش تعتق رحاب الرجال ديشوع وقالت نالخدمة دالملك قالت لهم بلي عاد مشاو، وهكذا مشاو الخدمة باش يلحقو عليهم. من بعد ما مشاو طلعت رحاب عند ديك جوج د الرجال الي خبعتهم وقالت لهم: " كنعرف بلي الله أعطى لكم هـ الأرض، والناس كاملين خوفانين منكم، حيث سمعنا كيفاش تشق البحر قدامكم، كنرغبكم باش تخلّيونني أنا والعائلة ديالي بالروح". وفي ديك الساعة قالو لها إذا بغات ينجاو خصّها قبل ما يرجعو تعلّق الخيوط د الحبل الحمر الي هبطتهم بيه في السرجم د الدار ديالها، وضروري ما تكون معها حتى العائلة ديالها كاملة تمّا باش تنجي هي وياهم.

- كيفما الله ديماً أمين مع أولاده، حتّى حنا خصّنا نكونو أمناء مع الناس.
- الله كيستعمل أكثر من طريقة باش يهدر مع الشعب دياره، وهّد المرّة أستعمل واحد المرأة زانية غير باش تعاون الشعب دياره.
- الله ما كيعلق شي غير الشعب د بني إسرائيل، ولكن كينجّي الناس كاملين الي كيآمنو به وكيطيّعوه.
- ملي كنطيّعو الهدرة د الله، كنجاو وهكدا كنعاونو حتّى العائلة ديانا باش تنجي.

45: المعجزة الّتي عمل الله في الواد د الأردن

يشوع 3

طاع يشوع الأمر د الله وأمن بلّي غير الله الي يقدر ينجّي الشعب د بني إسرائيل من الواد الحامل إلي عيقطعو، ويسهّل الطريق قدامهم، حتّى يقدرّو يقطعو الواد ويوصلّو فاين طلب منهم سالمين .

مشاو الرهبان الّتي كانوا مع القائد يشوع باش يقطعو ديك الواد و كان الشعب كامل موراهم، وغير عملو رجلهم في الماء د الواد، حتّى تقسّم على جوج بالقدرة د الله، وهكذا بداو الرهبان كيقطعو الواد بلا حتّى شي مشكل، والشعب كيقطع حتّى هو موراهم .

وقفو الرهبان في الوسط د الواد حتّى قطع الشعب كامل، وديك الساعة طلب يشوع من 12 راهب باش يرجعو نالواد ويهزّو 12 حجرة، باش يخليوهم علامة تمّا نالماشي والماجي، باش يتمجّد الإسم د الله ويتفكّروه بني إسرائيل ديماً، والترّيكة ديالهم، بلّي الله اعمل معجزات عظيمة في الحياة د الإسرائيليين، الّتي عمّرها ما تنسى، فحال البارح فحال اليوما.

طاعو ديك الرهبان الهدرة د يشوع ورجعو كيفما قالهم وهزّو الحجر، ومن بعد رجع الماء نالموطع ديالّه كيفما كان في الأول وحمل الواد مرّة أخرى.

- الدور د المؤمن القوي هو يعاون ويشجع المؤمنين الضعافين والصغارين في الإيمان .
- نكونو مؤمنين هادشي ماكيعني شي بلي ما عيكنوشي عندنا المشاكل، على ديك الشّي ما خصّنا شي نرجعو ناللور، حيث الله قادر باش يحلّ لنا المشاكل ديانا كيفما كانو.
- ملّي يعمل الله في حياتنا شي معجزة، يكون مزيان نعاونّها نالناس باش هكدا يتشجّعو ويمجدو الإسم دباله حتى هم.

46: الإستعمار دمدينة أريحا

يشوع 6

شاف الشعب د بني إسرائيل بزّاف د المعجزات الّي عمل الله معاهم، وكيفاش كانت اليد د الله كتحميهم. ديك الشّي الّي خلاهم باقي تايقين في الله، ومكّملين الطريق ديالهم معاه. وملي قربو نالمدينة د أريحا، و بان لهم السور ديالها، قالو هدي هي المدينة الّي واعدنا بها الله من قبل. في ديك الساعة هدر الله مع يشوع وقال له: "هد المدينة الّي قدامك هي أريحا، أنا كنعطيا لك كاملة، ولكن باش تقدرودخلوها، خصّك أنتين والشعب بني إسرائيل، تدوروكل نهار شي دورة على المدينة كاملة، ست أيّام. ولكن في النهار السابع، دورو عليها سبعة د المرّات، وحتى الرهبان خصّهم يدورو معكم وهم كينفخو بالبوق، وفي الدورة السابعة الّي هي الأخيرة ضروري على الشعب دبني إسرائيل يغوّت بالجهد معهم، حتّى يطيح السور كامل".

وديك الشّي الّي كان أعمل الشعب د بني إسرائيل ديك الشّي كامل الّي طلب منه الله، وديك الشّي الّي قال لهم هو الّي وقع، طاح السور د أريحا كامل، وهكذا قدرو يدخلو بني إسرائيل نأريحا، ماشي بالقوّة ديالهم، أولا حيت ما كيخافو شي، ولكن بالقوّة د الله بوحدّه.

- الله قادر يعمل المعجزات بنا ولا بلا بنا، ولكن هو
كيفضل يستعملنا غير باش يختبر الإيمان والتيقّة
ديالنا فيه .
- إذا بغينا نشوفو المعجزات د الله في حياتنا، في الأول
خصّنا نكونو متّاحدين مع خوتنا بقلب واحد وبإيمان
واحد.
- أي حاجة طلبها منّا الله خصنا نعملوها، وخّى تكون
كتبان لنا ماشي معقولة، باش يحقّق الإرادة ديالّه.

47: الرحمة د الله الكبيرة حتّى مع الشعب الّلي راسّه

قاصح

يشوع 8-9

وَحَيَّ أَعْمَلُ اللهُ كُلَّ دِيكَ الْمَعْجَزَاتِ مَعَ الشَّعْبِ دِ بَنِي إِسْرَائِيلَ، بِقَاوْهُمْ هَمْ هَمْ، حَرَمَ مَا تَبَدَّلُوْا، عَاوَدَ تَانِي غَلَطُوْا فِي الْحَقِّ دِ اللهُ، وَ وَحَيَّ دِيكَ الشَّيْءِ كَامِلِ الْيَّ عَمَلِ مَعَاهُمْ، بَدَاوْ مَرَّةً أُخْرَى كَيْعْمَلُوْا الْحَاجَاتِ الْيَّ مَا كَتَرَضِي شَيْءِ اللهُ وَكِيْزِيْدُوْا فِي الْعَصِيَّانِ دِيَالَهُمْ، وَلَكِنْ هَذِهِ الْمَرَّةُ اللهُ مَا سَمَحَلَهُمْ شَيْءٍ وَ عَاقِبَهُمْ وَ صَلَّطَ عَلَيْهِمُ الشَّعْبُ الْمَدْيَانِيِّينَ، سَبْعَ سَنِينَ وَهُمْ مُسْتَعْمِرِينَ فِي الْبِلَادِ دِيَالَهُمْ، وَكِيْسْتَغْلَوْا كُلَّ الشَّيْءِ الْيَّ فِيهَا. وَمَاشِيْ غَيْرَ هَذِهِ الشَّيْءِ، رَجَعُوْا بَنِي إِسْرَائِيلَ عَبِيدَ عِنْدَهُمْ .

حَتَّى نَوَاحِدِ النَّهَارِ عَادَ حَسَّوْا الْإِسْرَائِيلِيِّينَ بِالْفَلْطَةِ الْيَّ عَمَلُوْا مَعَ اللهُ، دِيكَ السَّاعَةِ نَدَمُوْا بِزَّافٍ، وَبَدَاوْ كِيْيَكِيُوْا وَيَرْغَبُوْا اللهُ، بَاشْ يَغْفِرْلَهُمْ وَ يَرْحَمُهُمْ. وَهَكَذَا شَافَ اللهُ بَلِّيَ الْإِسْرَائِيلِيِّينَ تَابُوْا وَتَوَاضَعُوْا، عَادَ حَنَّ قَلْبُهُ عَلَيْهِمْ وَسَمَحَلَهُمْ. عَلَى دِيكَ الشَّيْءِ جِي الْوَقْتُ الْيَّ صَيْفُ فِيهِ الْمَلَائِكَةُ دِيَالَهُ الْعَظِيمِ بَاشْ يَبْشُرُ وَاحِدَ مِنَ الرِّجَالِ دِ اللهُ الْيَّ عِيْكَوْدَهُمْ وَيُنْجِيَهُمْ مِنْ دِيكَ الْبِلَادِ وَالنَّاسِ دِيَالِهَا مَرَّةً أُخْرَى. شَكُونُ هُوَ هَذَا الرَّاجِلُ؟ وَشَكُونُ هَذَا الْيَّ يَقْدِرُ يَغْلِبُ دِيكَ الشَّعْبَ الْمَدْيَانِيِّينَ؟

- أَلِي كِيَطَغِي عَلَى اللَّهِ، دَيْمًا كَتَنَزَّلْ عَلَيْهِ اللَّعْنَةُ دِيَالُهُ.
- إِذَا تَوْبْنَا وَتَوَاضَعْنَا، اللَّهُ يَقْدِرْ يَرْجِعْ لَنَا كُلَّ الشَّيْ أَلِي خَسَرْنَا، وَحَتَّى الْعَلَاقَةُ دِيَالْنَا مَعَاهُ.

48: جدعون، قوّة د الله في وسط الضعف!

قضاة 6

"جدعون" هو الاسم د واحد الراجل الّلي كان اختارّه الله باش ينجّي الشعب بني إسرائيل من اليد د العديان ديالهم. جدعون هدا كان خدام في واحد المطحنة صغيرة، فحالّه فحال أي راجل عادي، حتّى جاه العزّ من عند الله، ملّي وقف عليه ملاك الله، وأمرّه باش يمشي في ديك الساعة يتحارب مع المديانيين، ويهنيّ الشعب ديالّه منهم.

في الأول خاف جدعون بزّاف حيث فكر بلّي باقي صغير، وما قدر شي يتيق بلّي الله اختارّه هو بالضبط، باش ينجّي الشعب ديالّه على يده. ولكن من بعد تشجّع جدعون وتاق في الله، وطاع الهدرة ديالّه.

وهكذا مشى جدعون وجمع أكثر من ثلاثين ألف عسكري باش يحاربو العديان ديالهم، ولكن الله قال له: "الشعب الّلي معاك بزّاف باش نصيفطهم نالمديانيين، هكدا إذا غلبتو عتفكرو بلّي أنتم بزّاف على ديك الشّي غلبتوهم. خصك تنقص منهم، باش ملّي تغلبو يتمجد الاسم دوالي ديالي ويشوفو الأسرائيليين القوة ديالي".

طاع جدعون الهدرة د الله وخلّى غير العسكريّ قال له عليهم الله، حتّى وصلّ العدد ديالهم 300 عسكري.

ووخيّ كانوا قلالين، تحاربو مع العديان ديالهم الّلي كانوا أكثر منهم بزّاف وغلبوهم بالقدرة د الله ونجاو بني إسرائيل، وهكذا تمجد الاسم د الله مرّة أخرى.

- نقدر و نخدمو الله كيفما كنّا، حيث الله ما كيختارنا شي حيث قويين أولا كبارين، أولا حيث عندنا القيمة مع الناس، لا، كيختارنا حيث كيعرف الي في قلوبنا.
- إذا غلبنا الأعداء ديانا هد الشّي ما كيغني شي بلي حنا قويين، ولكن كيغني بلي غير بالقوة دالله نقدر و نغلبو، بشرط تكون طريقة ديالّه باش يتمجد إسمه.

49: راعوث ونُعمي - مَلِي كَيْبَدِّل الله الحزن بالفرحة

راعوث

مشى عهد جدعون، وأختار الله موراها قضاء آخرين. وهيدا في العهد د شي قاضي من القضاة، كان الوقت د الجوع الي ما قدر حتّى شي واحد يتحمّلوا. على ديك الشّي قرّرت واحد العائلة من العائلات د بيت لحم في واحد النهار، باش ترحّل نمدينة موآب. وهذ العائلة كان فيها واحد الراجل مسمّي "أليمالك" ومراته "نُعمي"، وكانو عندهم جوج د الأولاد، الي حتّى هم بقاو معهم في موآب مدّة طويلة. مشات السنين وجات أخرة، ومات مول الدار الي هو الراجل د نُعمي، ومن بعد مَلِي فكّرو يتزوّجو ولآدها، تزوّجو بشي موآبيات مؤمنات الي ما كانو شي من بني إسرائيل، الي هم "عُرْفَة" و"راعوث". ولكن من بعد ماتو الأولاد د نُعمي، وبقات غير هي والنساء د ولآدها. ديك الساعة عيّطت نُعمي على راعوث وعُرْفَة وقالت لهم: "خصّ ترجع كل واحدة فيكم نالدار د مامّاها، والله يعطي لكم الراحة إنشاء الله في الديور د الرجال ديالكم"، حيت نُعمي فكرت في الخير ليلهم وفكرت بلي باقي عندهم الفرصة باش يتزوّجو. سمعت عُرْفَة نالهدرة د نُعمي ومشات فحالها ولكن راعوث ما بغات شي تمشي وقالت لها: "بلا ماتبزّر عليّا نخليك ونمشي، فاين ما مشيتي عنمشي معاك وفاين مانعستي عننعس، الشعب ديالك دياي والله ديالك دياي،

غير الموت ألي يقدر يفرّق بينتنا". وملي شافت نُعمي
بلي راعوت مصرّة على الهدرة ديالها، وافقت تديها
معها. وهكذا سافرت راعوث ونُعمي نببت لحم، وبدّاو
حياة جديدة تمّا. وفي واحد النهار ملي خرجت راعوث
باش تخدم في واحد الفدان د الشعير، كان في ديك الوقت
الشرع كيخلي الناس الفقراء يجمعو الشعير مور
الحصاد، وديك الشّي ألي عملت راعوث، مشات وبدات
كتخدم وكتجمع الشعير مور الحصاد. حتى نواحد النهار
شافها مول الفدان، ألي مسمي "بو عز" هد بو عز كان
كيجي نُعمي شي حاجة من العائلة د راجلها، عجبائه
راعوث بزاف وبقات فيه، وعونها، وفي الآخر تزّوج
بها.

من بعد عطى الله نراعوث واحد الولد ألي سماواه
"عوبيد" ألي غدي يكون جد نواحد الملك عظيم "داوود".
فرحو بزاف بهد الولد خصوصاً نُعمي حيت الله عوّضها
على راجلها وولادها ألي ماتو.

- الله كيخدم في كل واحد فينا بطريقة مبدلة، يمكن
كتبان بعض مرّات قاصحة، ولكن النتيجة ديالها
كتكون عظيمة.

- إذا صبرنا على ألي ضاع منّا، الله قادر يعوّضنا
ويردّ لنا الفرحة ديانا.

- الدور د المؤمن هو يعطي واحد المثال مزيان، باش الناس آخرين يأمنو.
- الّي كيبقش على شي حاجة كيديرها، على ديك الشّي خصّنا نبقشو على الرضى د الله وأي حاجة أخرة كتجي من بعد.
- كل واحد خلقه الله عنده شي هدف من حياته، وسعدات الّي حقّق الإرادة ديالّه.

50: حنة

1 صموئيل: 1-2

راعت كانت واحد المرأة عظيمة، والله جزاها ملي عطى لها واحد الولد الي كان جد الملك " داود". مشات أيام و جات أيام و خلق الله واحد المرأة مسمية "حنة"، وكانت هد المرأة واحد المرأة متقية الله و تبعى الطريق دياه، ولكن مسكينة كانت عاكرة، شحال د الوقت وهي مزوجة ومعطى هاشي الله اللولاد، والشريكة دياها كانت كتستغل هد النقطة باش تعصّبها وتعايرها.

كانت حنة مسكينة نهار مور نهار، وعام مور عام، كتمشي نعد الله في بيت الصلاة وكتبدي تبكي وتصلّي في السكات، وكتطلب منه باش يرزقها بشي ولد، وكانت واعدت الله بلي إذا رزقها بشي ولد عتوهبو له.

أستاجب الله نالصلوات د حنة، وما دار شي العام حتى كانت حبلت و ولدت واحد الولد الي سمّاه " صموئيل"، فرحات حنة بزّاف وحمدت الله وشكرته، وعطاته ولدها كيفما كانت واعدته، وهكذا في واحد النهار مشات نالمعبد وخلّاه تما هدية نالرب باش يخدمه حياته كاملة.

- شحال ما طال الزمان الله ضروري يحقّق الهدف دياه، ويعطي لكل واحد فينا على قد الإيمان دياه، غير خصنا نصبرو حتى يوصل الوقت.

- كل مؤمن خصّه يوفي بالعهد الّـي أعطى نالّـه، ويشكرّه على البركات ديالـه.
- الناس إلّـي عندهم الولاد خصّهم يرَبّيوهم فالأول على الطاعة د الله والطريق ديالـه.

51: الملك اللؤلؤ د الشعب بني إسرائيل

1 صموئيل: 8-9

مشات أيام وجات أيام، والشعب بني إسرائيل باقي ساكن في أرض الموعد، كيتبرّع بالخيرات الّلي أعطى لهم الله كيفما كان واعدهم من قبل. ومشات أيام وجات أيام ونسى الشعب د بني إسرائيل شني عمل الله معاه، وبدى كيغلط في الحقّ ديالّه فحال ديمًا. فالأول الله كان فرحان يكون هو الملك د بني إسرائيل. ولكن هم ما بغاو شي يحشمو، ما بغاو شي الله الّلي يحكم عليهم، بغاو يعملو كيفما عاملين القبائل آخرين، وخّى شافو ديك المعجزات كاملة الّلي عمل الله معاهم ما قنعو شي.

ديك الشّي كامل ما كان شي كافى بالنسبة لهم، حيث بغاو شي ملك الّلي يقدورو يشوفوه بعينهم، وما قنعو شي بملك الملوك الّلي هو "الله".

وهكذا شاف الله بلي القلب د ديك الشعب قاصح، وعرف النية ديالهم، على ديك الشّي قرّر يعملّه خاطره، وأمر صموئيل، الّلي باركه ورجّعه نبّي باش يعمل الإرادة ديالّه وماشي ديالهم، وهكذا عمل صموئيل يدّه على واحد الراجل مسمّي "شاوول"، وأختاره باش يكون هو الملك د بني إسرائيل.

شكون هو هد شاوول، الّلي اختاره الله من بين الناس د بني إسرائيل كاملين؟ وعلاش هو بالضبط؟

- ما خصّنا شي نعملو كيفما كي عملو الناس د العالم آلي
ما كي عرفو شي الله، حيث حنا عندنا ملك واحد وإله
واحد آلي هو الله وهو بوحده آلي خصّنا نفتخرو به.
- الربّ بغانا نتبعوه وحنّا تايقين فيه، ماشي حتّى
نشوفوه.
- بعض المرّات الله كي عطينا ديك الشّي آلي بغينا وخي
ما يكون شي صالح لنا، غير باش نفطنو بالغلط
ديالنا.

52:العصيان د شاول نالله

1 صموئيل 13-15

سعدات آلي كي عمل الله قدامه وموراها. إسرائيل ما عجباشي الحال باش يكون الله الملك ديالها. على ديك الشّي اختار لها الله واحد الملك كيفما بغات فحال الملك شاول: طويل و مزيون، ولكن "حتّى زين ما خطأته لولا".

شاول كان في الأول كيبان واحد الراجل مزيان، وكان كي طيع الله في كل حاجة كيأمره بها، ولكن ملي رجع قوي، طغى وتكبر وهكدا بدى كيتيق في رأسه أكثر من الله. وبدى كي عمل الخدمة آلي ماشي ديالها. ما بقى شي كيحترم حتّى الخدمة المقدسة آلي خاصّة غير بالفقيه بوحده. ديك الساعة، تنهّى عليه الله، وصيفط له حتّى صموئيل يتنهّى عليه باش يرجع نالطريق. ولكن خسارة، شاول كان رأسه قاصح، وما كيسمع حتّى نشي واحد، وعاد ما بقى شي كيخاف من الله، وحتّى الشوّافة بدى كيمشي عندها، وهد الشّي كامل كان كافي باش يتعصب عليه الله.

ملي شاف الله بلي شاول باقي هو هو، وما بغى شي يتبدّل، ديك الساعة صيفط له مع صموئيل الرسالة الأخيرة، وقال له: "حيث ما سمعتي شي الهدرة د الله وطغيتي، الله اليوما ما بغاك شي تكون الملك د إسرائيل.

و في هد النهار الله أختار الملك الّٰي عيسمع الهدرة ديالّه
ويعمل بالوصيّة ديالّه".

- ملّٰي يباركنا الله، مزيان نشكروه ونبقاو تابتين فيه،
ونمشيو في الطريق ديالّه.
- خصّنا نكونو متواضعين وما نتكبرو شي .
- وخّى نغلطو، الله ديمّا كيعطينا فرصة أخرة باش
نرجعوله على ديك الشّي مزيان نستغلّو ديك
الفرصة وما نضيعوها شي.

53:العقاب د الله نجوليات والفلسطينيين

1صموئيل 16-17

وخى ما بقى شي الله فرحان بشاول، خلى له الحق باش يحكم في ديك الوقت. أمّا بالنسبة نالله، هد المرّة أختار واحد الولد مسمي "داوود". كيقول الكتاب بلي داوود كان كيبيغي الله بزّاف، وكان قريب منه بزّاف، حيث كان مؤمن عظيم والتيقة دياؤه كانت ثابتة في الله. ملّي شاف الله القلب د داوود عرف بلي النية دياؤه مزيانة، وقرّر يرجّعه الملك د إسرائيل، وخى كان غير "سارح" د الغنم في شي يامات.

واحد النهار ناضت الحرب بين بني إسرائيل و الفلسطينيين، والخوت د داوود حتّى هم كانو كيحاربو معاهم، وملّي مشى داوود باش يشوف كيفاش هم خوته في الحرب، جبر واحد العملاق من العديان مسمي "جوليات"، كيبان على شعب دياؤه وكيعايرهم، حيث كيفكر بلي حتّى واحد مايقدر يغلبه. ديك الساعة تعصّب داوود وما رضى شي بالحكّة، وبدى كيستغرب علاش بني إسرائيل كاملين خوفانين من هد جوليات، وحتّى واحد ما قادر يوقفو على حدّه. حسّ داوود بالغيرة على الشعب دياؤه ومشى كيحارب مع هد الفليستيني، إذا أعطاه هد الحق، و وخى ما كان شي عنده اللباس د الحرب. وملّي أعطى له شاوول ديك اللباس ما لبسو شي حيث

عمره ما لبسه من قبل، وهكداك مشى يدّابز مع جوليات،
هزّ من الواد واحد خمسة د الحجرات، وأعملهم في
الصاك ديالّه، هم والمقلاع، ووقف قدام جوليات الي كان
مسلّح .

وملي شاف جوليات داوود بدى كيحكّره بزّاف، وكيقول
له: "واش أنا كلب باش ماجي تدّابز معايا بالعكاز؟ اليوما
عنورك شكون أنا، وعنخلي الطيور ياكلوك!"

جوليات كان كيفكر بلي القوة في الجسد، أما داوود
السلّاح ديالّه كان هو التّقة ديالّه في الله، والجواب ديالّه
كان هو هدا: "أنتين ماجي تدّابز معايا بالسلّاح، أمّا أنا
ماجي نعنذك بإسم الله د الناس الي عايرتي. وعنغلبك
بالقوة د الله، باش كل الشّي يعرف بلي ماشي بالسلّاح
كيغلبو الناس لا، غير بالقوة د الله".

وغير بداو كيدابزو شيّر داوود بالمقلاع على جوليات،
وجأته الحجرة بالقدرة د الله في الصنطيحة ديالّه وطاح
في الأرض على وجهه ومات، ديك الساعة قطع داوود
الراس د جوليات وورّى نالملك شاول شنو كيسوى.
وهكدا غلبو بني إسرائيل الفلسطينيين، ورجع داوود بطل
في العينين د شاول والشعب ديالّه وحتى د العديان ديالّه.

- مَلِّي كَنكونو بعادين من الله، أي حاجة كَتخوَفنا، وهد
الخوف كَنزرعوه حتَّى في الناس الِّي معنا.
- إذا كانت التقة ديالنا غير في الله، كيتحيّد منّا الخوف
، وهكدا نقدرو نحاربو العدو بالقوّة د الله الِّي فينا.
- ما عمّرنا نحكّرو شي مؤمن حيت القوّة د الله كتبان
في الضعف د كل واحد فينا.
- إذا كنّا كنغيرو على الإسم د الله والكلمة دباله، نقدرو
نغلبو العدو د الخير الِّي هو الشيطان.

54: الملك داود

2 صموئيل 2-5

سبحان الله العظيم، ديمًا كيتحقق الوعد د الله بالحرف، واليوما تحيّد شاول من الملك كيفما بغى الله. وولّى في الموطع دباله داود الّى كان غير سارح د الغنم، بين يوم وليلة ولّى الملك د الإسرائيليين، تصوّرو!

إيّه، د بالصّح، داود الّى كان غير سارح د الغنم، ولّى الملك مور شاول، وهكدا في وقت د الملك دباله، تبدلات الحياة د بني إسرائيل بزّاف. وأي حرب كان كيحارب فيها داود، كانو كيغلبو. تغناو الإسرائيليين على يده وهكدا رجع عندهم داود عزيز أكثر من الأول، وما بقاو شي قادرين يستغناو عليه، حيث كان شي راجل الّى كيخاف الله، وكيطيع الوصيات دباله. على ديك الشّي باركّه الله بزّاف، ولكن ديمًا كيبقى بنادم هو بنادم، ضروري عنده شي نقطة د الضعف.

فحال داود، وخّى هدّ التقوى كاملة الّى فيه، ما مشى حتّى طاح في واحد المعصية كبيرة مع الله. حيث في واحد النهار في فصل الربيع، خرجو بني إسرائيل باش يتحاربو مع القبيلة د العمونيين. وحتى داود كان خصّه يخرج مع الجيش دباله ويكوّده في ديك الحرب، ولكن هو ما مشى شي وصيّف غير الجيش دباله بوحدّه، وبقي هو في القصر، شنو الّى عيكون خلاّه يعمل هكدا؟

- الله ما كي عمل شي الفرز بين الناس، ولكن الطاعة والتواضع هم الّي كيخلّيو الله يعلّي الشان دالناس ويباركهم.
- إذا كان الله معنا، أي حرب دخولنا فيها عنغلّبو بالقوة ديالّه.

55: النقطه د الضعف د الملك داوود

2 صموئيل 11

في واحد العشية من العشيات، فاق الملك داوود من النعاس، وبدى كيتسارى في السطح د القصر دياله. شوية وهو يشوف واحد المرأة مزيونة بزاف عريانة كتدوش. وهكذا زاغ وصيفت الخدامة دياله باش يصقصيو عليها، ووخي عرف بلي هي مزوجة، طلب منهم يجيبها له.

ايوا ملي أمر الملك، ما كان على الخدامة غير الطاعة، وديك الشئ الي وقع. في ديك العشية جابوله ديك المرأة الي كانت مسمية "بثشبع" حتى نعهده. وخی عرف بلي هي المرأة ديال "أوريا"، الي هو واحد العسكري من العسكر الي عنده الي كانو كيخدمو معاه بالنية ، والي مشى يحارب مع الجيش ضدّ العديان. غمض عينه داوود على الحق، وغلط في الحق د الله وفي الحق د أوريا ونعس مع بثشبع بلا خبار راجلها.

وهيدا مشات أيام وجاءت أيام، ووصل الخبر نداوود من عند بثشبع بلي هي حاملة منه، وتما بدى داوود كيفكر كيفاش يحلّ هذ المشكل، ويخرج منه "فحال الشعرة من العجين". في الأول فكر داوود باش يرجع أوريا من الحرب دغيا، وملي يمشي نالدار دياله، ينعس مع مرأته في ديك الليلة، ويرجع "مريضنا ما عنده باس"، وهكذا يبقى داوود بعيد، و يفكر راجلها بلي هي حاملة منه.

وملّي رجع أورّيّا من الحرب كيفما أمر الملك داوود، ما
بغى شي يرجع نالدار دباله في ديك الوقت، حيث كانت
العادة، ملّي كيكون شي موسم د الحرب، ممنوع على
العسكر، ينعسو مع النساء دبالهم، حتّى يرجعو خوتهم
الّي باقين في الحرب، غالبين ولا خاسرين.
وديك الشّي الّي عمل أورّيّا! وهكدا تعصّب داوود بزّاف،
حيث ما جبر كيفاش يحلّ ديك المشكل بلا فضيحة، ديك
الساعة قرّر باش يتفكّ من أورّيّا بأي طريقة.
و في ديك الأيام رجع عاود تاني أورّيّا نالحرب، وهو
يعيّط داوود نالرئيس د العسكر، وأمره باش يعمل أورّيّا
في الصفّ الأوّل قدام العديان، باش يقتلوه .
وديك الشّي الّي كان. مات أورّيّا مغدور، كيفما خطّط له
داوود. وملّي دازت الكنازة، تزوّج الملك داوود ببثشبع
وجابها نالقصر دباله، و من بعد ولدت له ولد.
ولكن الله ما كان شي فرحان بالفعال د داوود، وبديك
الشّي الّي أعمل.

- القائد الخدمة ديالُه هي يَكْوَد العسكر في الحرب وإدا غَش في الخدمة ديالُه كيغلط في الحق د الله وفي الحق د الناس الي معاه .
- إدا غلطنا وما ندمنا شي وبغينا نصلحو الغلط ديالنا كيفما بغينا، كنزیدو نغلطو أكثر.
- كل خطيَّة كنعملوها هي ضدّ الله، وهو ما عمرُه عيفرح بها بالعكس، هو عزيز يتعصّب منّا وعيبيقى يستنى نتوبو.

56:آلي أعمل الدنب، كيستاهل العقوبة!

2 صموئيل 12

في العهد القديم، كان لا بدّ ما يكون عند الله شي نبّي آلي يوصل الإرادة دياّله نالشعب. وهّد المرّة الله صيفط واحد النّبّي إسمه "ناثان" و أمره باش يوصل واحد الرسالة نداوود باش يأدّبه.

مشى النّبّي ناثان عند الملك داوود، وبدى كيعاود له هّد القصّة وقال له: "كانو واحد جوج د الرجال ساكنين في واحد المدينة، واحد فيهم لاباس عليه وعنده الكسيبة بلا حساب، وأخور كان مسكين، ما أعطاه ربّي غير واحد الجدية صغيرة، آلي ربّها في وسط أولاده. ناض آ سيدي، الراجل آلي لاباس عليه في واحد النهار، ملّي جاو عنده شي ضياف. خلّي الكسيبة آلي عنده كاملة ومشى ذبح الجدية د ديك الراجل مسكين".

ديك الساعة تعصّب داوود وهو كيسمع نديك القصّة، وقاطعه وقال: "هّد بني آدم كيستحقّ الموت، وخصّه قبل ما يموت، يردّ نموّلاها 4 د الجديات حيت ماعزّشي عليه ومشى ذبح الجدية ديك الراجل مسكين!"

جاوبه النبي ناثان ديك الساعة وقال له: "أنتين هو ديك الراجل وهكذا قال لك الله "أنا رجّعتك الملك د إسرائيل وأعتقتك من اليدّ د شاول، وأعطيتك الخير كامل، وأنتين شبرّتي وقتلّتي أوريا مسكين، وأدّيتي له مراتّه".

ديك الساعة عاد عاق داوود بالخطيئة اليّ أعمل وأعترف
نالله بكل الشّي. وندم بزاف و طلب من الله السماحة على
كل الشّي اليّ أعمل، وقال ناثن نداوود: "علاحقاش
خلّيتي العديان يشمتو في الله ولدك اليّ خلاق عيموت".

- قبل ما نشوفو العيوب د الناس، نشوفو العيوب ديانا،
وقبل ما نحكمو على الناس، نحكمو على راسنا، قبل
ما يحكم الله علينا.
- ماعمّرنا نطمعو في القليل اليّ عند الناس وننساو
الكثير اليّ عندنا باش الله يزيّد يباركنا .
- إذا غلطنا وتوبنا، الله واجد باش ويسمح لنا يغفر لنا
كولشي، ولكن خصّنا نقبلو النتيجة د الغلط ديانا.

57: الملك سليمان الحكيم

1 ملوك 1-12

كان الله واعد من قبل الشعب دياؤه، بلي إذا أغفر لهم الذنوب ديالهم بالرحمة دياؤه الكبيرة، عيسىب ديك الذنوب كاملين الي عملو في القاع د البحر وينسى هم.

وهذ الشي الي أعمل مع داوود، من بعد ما حرمة من ولده الأول من بثشبع، رجع حنّ عليه ورزقه بولد أخور معها الي سمّاه "سليمان" وهو الي شبر الحكم مور باباه.

ملي بدى كيكبر سليمان الملك، في واحد الليلة ضهرله الله في واحد الحلم، وقال له: "شني بغيتي نعطيك؟"، وهكذا طلب سليمان من الله يعطيه الحكمة، باش ملي يولي كيحكم في المستقبل يحكم بالعدل على الشعب دياؤه. وديك الشي الي وقع، أعطى الله نسليمان شي حكمة الي ما نقدر شي نتخيلوها، وباركه بيزاف د الموهبات منها : يكتب الأغاني الروحية، الشعر، والأمثال الشعبية، وماشي غير هذ الشي، الله رزقه بيزاف ورجعه أغنى واحد، وولي معروف عند ديك القبائل والملوك كاملين، والشعب دياؤه ماكان ناقصه حتّى خير معاه، ولكن نرجعو فحال ديماً ونقولو بنادم هو بنادم، وسليمان حتّى هو فحاله فحال الناس الي كانو قبل منه، ضروري ماتكون عنده شي نقطة د الضعف.

وخي كان عند سليمان كل الشي، بقى حتّى طاح في الخطية، ملي عصى الله وتزوج بيزاف د النساء، الي ما

كانوشي كيامنو بالله واحد. وبقى متبّعهم حتّى خرّجوه
على الطريق د الله، ورجع كي عبد الألهة ديالهم. وهّد الشّي
خلّى الشعب ديالّه يكفر ويخرج حتّى هو على الطريق د
الله. ولكن الله أمين و كيبيغي العدل على ديك الشّي ما
خلّى شي سليمان على خاطرّه، وعاقبه وسخط على
السلالة ديالّه، وقطع الرجاء ديالها باش تحكم إسرائيل
مرّة أخرى .

- أحسن حاجة الي نقدر نطلبوها من الله هي الحكمة.
- خصّنا نكونو مقبولين عند الله ماشي عند الناس.
- القائد هو المثل د الشعب ديالّه، إذا طاح حتّى هم
يقدر يطيحو معاه، على ديك الشّي خصّه يكون
قريب من الله.

58:الفرصة الّٰي أعطى الله نالشعب ديالْه باش

يتوب

1ملوك 13-16

الله ديمًا أمين والكلمة ديالْه ثابتة وعمرها ما كتطيح نالأرض. خلّى سليمان في الحكم حتّى كمل الوقت ديالْه، ومليّ جى الوقت الّٰي يحكم فيه ولدُه، تقسّمت المملكة على جوج حيث ما كان شي كيحكم بالعدل وهكذا بقى الحال كل مرّة كيحكم شي ملك، وحتى واحد فيهم ماكان فيه الرباح. ديك الشّي الّٰي خلاهم كيدايزو بيناتهم باش يشوفو شكون قوّي على أخور، ونساو الوصيّات د الله وبدّاو كيفكرو غير في المصلحة ديالْهم. وخرجو على الطريق د الإيمان وخرّجو حتّى الشعب معاهم، ووصلت بهم الحالة حتّى بدّاو كيعملو المنكر و يعبدو الأصنام. وهكذا تعصّب الله من الفعايل د ديك الملوك وبقى فيه الشعب، وكيفما ديمًا المحبة د الله أكبر من كل الشّي. قرّر عاود تاني يصيفط الأنبياء باش يهدرو معاهم على الله يردّو البال نديك الشّي الّٰي يعملو ويتوبو ويرجعو نالطريق د الله .

- مَلِّي ما كنخليو شي الروح د الله يسكن فينا، هكدا
كنعطيو الفرصة نالشيطان باش يبعّدا على الله.
- باش نرجعو قادة ضروري خصّنا نكونو مسؤولين
باش نعطيو واحد المتال مزيون نالناس الي معانا.
- الله عمّره ماكيفرح بالخطية ديالنا، وهو ديماً واجد
باش يسمح لنا على الأخطاء ديالنا بشرط نتوبو
ونعملو بالوصية ديالّه.

59: المرأة الهجالة

1ملوك 17

مَلِي كَانَ النَّبِيُّ إِيلِيَّا قِي إِسْرَائِيلَ، جِي وَاحِد الْوَقْت د
الْجَفَاف شِي 3 سَنِينَ، وَهَكَذَا طَلَبَ اللَّهُ مِنْ النَّبِيِّ إِيلِيَّا بَاشْ
يَمْشِي نَوَاحِدَ الْمَدِينَةِ مَسْمِيَّةً صَرْفَةً، وَدِيكَ الشَّيْ أَلِي
أَعْمَلُ.

مَلِي وَصَلَ النَّبِيُّ إِيلِيَّا نَمْدِينَةَ صَرْفَةَ جَبَر وَاحِدَ الْمَرْأَةِ
مَسْكِينَةَ كَتَجْمَعُ الْحَطَبَ، وَكَانَتْ دِيكَ الْمَرْأَةُ هَجَّالَةً وَعِنْدَهَا
غَيْرَ وَاحِدِ الْوَلَدِ. طَلَبَ مِنْهَا بَاشْ تَعْطِيهِ يَشْرَبُ، وَهِيَ
مَاشِي تَجِيبُ لَهُ الْمَاءَ، طَلَبَ مِنْهَا عَاوَدَ تَانِي تَجِيبُ لَهُ شَيْ
طَرَفَ دِ الْخَبْرِ، جَاوَبْتُهُ دِيكَ الْمَرْأَةُ وَقَالَتْ: "اللَّهُ دِيالْكَ
حَيَّ، مَا عِنْدِي غَيْرَ وَاحِدِ الْحَفْنَةِ دِ الطَّحِينِ، وَشَوِيَّةَ دِ
الزَّيْتِ، بَاشْ نَعْجَنُ الْخَبْزَ لَيْلِي وَنَوْلَدِي بَاشْ نَاكْلُوهُ وَمِنْ
بَعْدِ نَمُوتُو". دِيكَ السَّاعَةَ قَالَ لَهَا النَّبِيُّ إِيلِيَّا: "مَا تَخَافُ
شَيْ، مَشِي وَأَعْمَلُ لِي أَنَا الْأَوَّلُ وَاحِدَ الْخُبْزَةِ صَغِيرَةٍ
وَجِيبَهَا لِي، وَمِنْ بَعْدِ عَمَلِ لَيْلِكَ وَنَوْلَدِكَ حَيْتُ اللَّهُ قَالَ
عَمَّرُهُ مَا يَنْقُصُ لَا طَّحِينَ وَ زَيْتٍ مِنْ الدَّارِ دِيالْكَ حَتَّى
تَطِيحَ الشِّتَاءَ". وَدِيكَ الشَّيْ أَلِي وَقَعَ، مَشَاتْ وَعَمَلَتْ دِيكَ
الْخَبْزَ وَدَاوُ وَبَزَّافَ دِ يَامَاتِ وَبَاقِي مَا تَقْضَى لَهَا لَا
الطَّحِينَ وَلَا الزَّيْتِ.

دَاوَزَتْ الْأَيَّامَ وَ مَرَضَ وَلَدُهَا وَمَاتَ، وَ مَشَاتْ دِيكَ الْمَرْأَةُ
كَتَجْرِي عِنْدَ النَّبِيِّ إِيلِيَّا وَدَارَتْ فِيهِ وَقَالَتْ لَهُ: "شَنِي بَيْنِي
وَبَيْنَكَ، وَاشْ جِيتِي نَعْنَدِي بَاشْ تَفْكَرْنِي فِي الدَّنْبِ دِيَالِي

وتقتلي ولدي؟" ديك الساعة أدّى إيليا ولدها نالدار دياؤه
وبدى كيصلي نالله باش يحيي ديك الولد، وأستجاب الله
نالصلوات دياؤه ورجّع الروح في ديك الولد. وهكذا
فرحت ديك المرأة بزّاف وقالت نايليا: "دابا عاد أعرفت
بلي أنتين الراجل د الله، والهدرة الي قولتي هي الحق".

- الإيمان والطاعة ديانا هم الي يقدر و يعطيو لنا الحياة
الأبدية .
- إذا أقنّعنا بديك الشّي الي عندنا، عيباركنا الله أكثر و
أكثر.
- مّلي يكونو عندنا المشاكيل خصنا نتيقو في الله وما
نساو شي كيفاش كان كيباركنا من قبل.
- مزيان نتعلّمو نشكرو الله ديمّا، لا في الوقت الصعب
ولا في الوقت الفرحة.

60: إيليا والوقت الصعب الي دوز

1ملوك 18

دوز الشعب د بني إسرائيل وقت صعب ملي كان كيحكم عليهم واحد الملك مسمي "أخاب" ومراته "إيزابيل". كانو هم أكفس الملوك الي حكمو في ديك الوقت، حيث قتلو بزاف د الأنبياء، على ديك الشئ صيفط لهم الله النبي إيليا باش يهدي الشعب دياه ويعتقو من الأنبياء الكدابة الي كانو كترو عندهم في ديك الوقت.

في ديك الوقت كانو شي 450 نبي كذاب الي كيكذبو على الناس بالإسم د الإله "البعل"، ووخي هكداك تحدّي إيليا الشعب كامل باش يبين لهم القوة د الله وكان كيقل لهم: "أنا بوحدني الي بقيت من الأنبياء د الله، وأنبياء البعل 450 راجل، أعطيو لنا غير جوج د تيران، وهم يختارو واحد الثور ويقطّعوه ويعملوه فوق الحطب بلا عافية، وحتى أنا نعمل فحالهم، وهم يعييطو على الألهة ديالهم وأنا نعيّط على الله دوالي، والله الي يعمل العافية هو هداك الي الله د بالصّح"، واتفق الشعب كامل على ديك الشئ الي طلب منهم.

ملي عملو ديك الشئ الأنبياء الكدابة أعيّو مايعييطو و يشطحو نالّهم ديالهم من الصباح حتّى نالظهور ووالو، ووصلت بهم الحالة حتّى يجرحو راسهم ووالو. وملي جات النوبة د النبي إيليا، طلب منهم يكوّبو الماء على الحطب، باش يزيد يورّي لهم العظمة د الله، وعيّط إيليا

نالله وكانت المعجزة. شعلات العافية في ديك الحطب
وخى كان فازك بالماء"، وملّى شاف الشعب ديك الشّي
طاحو على وجوههم وبداو كيقولوا: "الله هو الله، الله هو
الله".

وهكدا ورّى الله نالشعب ديالّه الحق على اليد د النبي
إيلّيّا، ورجع المجد نالله مرّة أخرى.

- الإيمان ديالنا ما خصّو شي يكون على حساب العدد
د الناس، حيت الله حقّ وما عنده حتّى علاقة بشحال
د الناس كيأمنو بيه.
- الله كيقبل غير الصلاة الّي كتكون بإسمه ماشي
بالإسم د شي إله أخور.
- الله كيستاجب لنا ماشي غير باش يعطينا الّي خصّنا،
لا حتّى باش يورّي لنا القوّة ديالّه ويتمجّد إسمه.

61:النبي أليشع كيشافي نعمان من البرص

2ملوك 5

من بعد مارفع الله إيليا، جى موراه واحد النبي مسمي أليشع وحتى هو كان صيفطه الله. وفي الوقت دياله كان في سوريا واحد الراجل مسمي "نعمان"، نعمان هدا كان واحد القائد د العسكر مزيان، ولكن كان عنده البرص في الجسم دياله كامل، وكانت كتخدم في الدار دياله واحد الخدامة ليهوديّة، في واحد النهار مشات عند مراته وقالت لها: "مصّاب كون كان سيدي قدام النبي الي في السامرة، كون شفاه من البرص".

وملي قالتها له مراته عمل بالهدرة ديالها ومشى نعنده، و ملي وصل نعمان نالباب د الدار د النبي أليشع تلاقاه واحد الراجل الي كان صيفطه له وقال له بلي سيده الي هو النبي أليشع كيطلب منه باش يمشي نالواد د الأردن ويغطس فيه سبعة د المرات. وفي ديك الوقت نعمان كان معصّب بزاف حيث حس بلي هو غير شي واحد عادي ملي صيفط له النبي غير الخدام دياله يهدر معاه وما جى شي براسه يستقبله. وديك الشّي خلى نعمان في الأول يتردد ولكن الخدامة دياله في الآخر قنعوه باش يعمل ديك الشّي الي طلب منه أليشع حيث ما طلب شي منه شي حاجة كبيرة، وأقتنع نعمان بالهدرة د الخدامة دياله ومشى نالواد د الأردن وغطس فيه سبعة د المرات كيفما قاله نبي، وتشافى في الحين من البرص الي كان فيه.

رجع نعمان عند النبي أليشع فرحان وقال لله: "دبا عاد عرفت بلّي ما كاين شي شي إله من غير الله الّي في إسرائيل."

- مهم بزّاف نشركو مع الناس الّي محتاجين الإيمان ديالنا ونعاونوهم باش يعرفو بلّي الله بوحده الّي قادر يعاونهم في كل حاجة .

- إذا بغينا الله يعاوننا خصّنا في الأول نكونو متواضعين معاه، ونطيعو الهدرة ديالّه.

- الله كي عمل المعجزات باش الناس يعرفوه ويمجدو الإسم ديالّه.

62: الملاقية د النبي إشعيا مع الله

إشعيا 6

إشعيا هو واحد النبي من الأنبياء الي كان صيفط الله نالشعب دياله، كان ساكن في إسرائيل، وكان واحد الراجل متاقف حيث كان خدم مع بزاف د الملوك.

في العام الي مات فيه الملك عوزيا، شاف النبي إشعيا واحد الرؤيا: شاف المجد والعظمة د الله، وشاف شحال الله قدّوس، وفي نفس الوقت شاف رأسه شحال موسّخ وعامر بالدنوب. ديك الساعة حشم بزاف من رأسه، من بعد شاف واحد الملاك دخل في الوسط د الرؤيا دياله باش يبين نإشعيا الغفران د الله و يغسله من الدنوب دياله كاملين، وأمره باش يبشّر الشعب بالكلمة د الله وبالنبوءات د المستقبل.

وبكل فرحة جاب إشعيا الله وقال له: " ها أنا يا ربّي صيفطني، أنا واجد "، من مور ديك الرؤيا الي شاف إشعيا دخلت الفرحة نحياته وكان كي عمل بالهدرة د الله كاملة وكان كيتنبأ بالناس كيفما كان قال له الله. وكان ديمّا كيهدر لهم على شي واحد الي عيجي باش ينجيهم. واش عرفتو شكون يقدر يكون هّد الواحد؟

- الناس كاملين، وحتى الأنبياء في العينين د الله كاملين
خاطيين وعامرين بالدنوب. على ديك الشّي كاملين
بنا محتاجين نالتوبة والغفران د الله.
- الله بغانا نعرفوه على ديك الشّي كيظهر لنا بعض
المّرّات في شي رؤيا ولا في شي حلم ولكن خصّنا
نكونو واجدين نطيعوه باش يطهرّنا ويغفرلنا.
- إذا أترفنا نالله بالدبوب ديالنا وتوبنا، أكيد عيغفرلنا
وعيعطي لنا فرصة أخرة باش نخدموه، خصّنا غير
نكونو واجدين نهد الخدمة.

63: الله كيهدر مع إشعياء على المَجِّي د المسيح

إشعياء 53

شحال كان عند النبي إشعياء الزهر باش يتنبأ بالمَجِّي د يسوع المسيح نالشعب ديالْه ويقول لهم بَلِّي يسوع عيكون من التريكة د الملك داوود.

النبي إشعياء كتب بزّاف د النبوءات على المسيح، منهم كيفاش عيجي، و شحال عيتعدّب حتّى يموت ويقوم من الموت غير باش يعطي الحياة الأبدية نهديك الي آمنو بيه.

وكتب النبي إشعياء عاود تاني بَلِّي يسوع المسيح عيحمّ على طول الزمان، وزاد قال بَلِّي هدي كاملة كانت الخطة د الله وعتحقّق د بالصّح. هَد الشّي كامل كتبو النبي إشعياء هدي تقريبا 800 عام قبل المَجِّي د يسوع المسيح، وكان قال: "شكون تيق الهدرة ديانا؟ وعلى من نزلت اليد د الله؟ عيطلع فحال الزراع قدامه، وفحال العرق من الأرض اليابسة. ماشي مزيون، وما فيه حتّى منظر الي نتشهّواه، محكّور من عند الناس وفيه الحريق، جرّب العذاب حتّى ما قدارنا شي نشوفو فيه، ما عنده حتّى قيمة، أكيد أدى الأمراض ديانا وتكرّس بالحريق الي كنستحقو، حنا الي صوّطنا وجرحناه، بالحق هو تجرّح بالسباب الطغيان ديانا وتطحن بسباب الذنوب الي عملنا، العقوبة الي كنّا كنستحقوها باش يكون عندنا السلام، تحملها هو بوحدّه. وبالجرح ديالْه حنا تداوينا.

كاملين خرجنا على الطريق فحال الغنم، كل واحد في طريقه، بلحاق الله عمل عليه الذنوب ديالنا كاملين، وخي دليناه ما فتح شي فمه، فحال الحولي أدينا نالكرنة، وفحال الغنمة قدام الدبّاح ديالها، بقي ساكت وما فتح شي فمه، بالحبس والمحكمة تحيد. وشكون الي كان كيظن بلي تقلع من الأرض د الأحياء بالسباب الطغيان د القبيلة ديالي؟ توجّد باش يتدفن مع المجرمين ولكن تطمر مع الأغنياء، وخي هو عمره ماعمل شي حاجة خايبة، ولكن الله فرح يعدبه ملي أعطى حياته ذبيحة باش تكبر التريكة دياله. وباش يشفع لنا، هزّ الذنوب ديالنا، وتعذب بالسباب د المعصيات ديالنا".

- ملي نتوبو وتتطهر النفس ديالنا، خصنا نطيعو الله، حيث غير هو الي قادر باش يفتح العينين ديالنا، ويورّي لنا كيفاش نمشيو في الطريق دياله.
- الله كيبيغينا بزاف على ديك الشّي تعذب المسيح ومات وقام من الموت غير باش يعطي لنا ونالناس كاملين الي أمنو بيه الحياة الدائمة.
- الله بوحدته الي كان عنده الحلّ باش يصلحنا معاه، وأصلاً هو الي خطّط من الأول باش ينجينا، حيث بغانا وكيبيغينا وعيبيغينا ديمًا.

64: القصة د أيّوب

أيّوب

أيّوب كان واحد الراجل لابس عليه، وكان متقي الله وكيبغي الله بزاف كيمشي في الطريق دياؤه. ولكن الشيطان ما كان شي فرحان بهد الشّي، على ديك الشّي مشى الشيطان عند الله و قال له: "أيّوب ما كيبدك شي غير هكداك وصافي أولا كيبيغيك لله في سبيل الله، لا، حيت أنتين أعطيتيه كل الشّي، على ديك الشّي كيبيغيك. جرب حيّده الّي عنده و شوف واش عيبقى هكداك". جاوبه الله وقال له: "مشى أعمل الّي بغيتي فيه، ولكن حياته ما تحديها شي".

وهكدا طيح الشيطان على أيّوب بزاف د المصيبات، فحال: الشفارة الّي قتلوا الخدامة دياؤه، والبهايم الّي تسرقات، وولاده الّي ماتو ملي طاحت عليهم الدار. ووخي ديك الشّي كامل الّي وقع أيّوب باقي كيبيغي الله وكيقول: "الله الّي أعطى وهو الّي كيدي، مبارك الإسم د الله". ولكن ديك الشّي كامل ما كان شي كافي نالشيطان، على ديك الشّي خرج بزاف د الدمامل في الدات د أيّوب كاملة.

ملي شافت ديك الشّي المرأة د أيّوب، ما صبرت شي وقالت له: "واش باقي مشبر في الهدرة دياالك، لعن الله وموت"، وجاوبها أيّوب وقال: "كتهدر فحال النساء الّي

جاهلين، واش نكلو غير الخير من عند الله، والشر ما نكلوه شي؟".

وحتى ملى جاو صُحابُه و شافوه في ديك الحالة ظنّو بلى الله كيغاقبُه حيث أعمل شي دنّب، وبداو حتّى هم كيغوّتو معاه وكيلوموه كيقولولُه باش يعترف بالخطيّة الى عمل باش وصل نهّد الحالة، ولكن أيوب كان متأكد بلى ما عمل حتّى شي دنّب، وخی ما عرف شي علاش طاحت عليه ديك المصيبات كاملة، بقى تايق في الله حتّى نواحد اللحضة الى ما قدر شي يصبر فيها نالحريق الى كان فيه وتمنى الموت و شكّ في العدل د الله. و من بعد ديك الشّي كامل الى تكرفص جى الله عند أيوب وهدر معاه وجهه نالوجه وقال له أيوب: " كنت كنسمع عليك ولكن دابا عاد عرفتك حيث شفتك بعيني".

من بعد الله سمح نأيوب و عوّضه على كل الشّي الى ضاع منه و رزقه بأكثر من الى كان عنده من قبل، حيث بقى ثابت في الإيمان دباله.

- الشيطان هو العدو ديالنا، وهو ديماً كيبقش على شي طريقة باش يخسر العلاقة ديالنا مع الله، ولكن ما يقدر شي حيث غير الله بوحدّه الى عنده السلطة على الروح ديالنا.

- ما خصنا شي نسمعوا نالهدرة د الناس الى ما كيفهمو شي القصد د الله وخی يكونو من العائلة ديالنا.

- بالصبر ديانا في الوقت د الضيق نقدر و نعرفو الله أكثر.

- إذا توبنا الله واجد باش يغفر لنا الأخطاء ديانا .

65: الملك د بابل والصنام ديالهُ

دنيال 3

ملي هجم الملك د بابل الي مسمي نبوخذنصر على أورشليم غلب غير بالإدن د الله حيت الشعب د بني إسرائيل كانو خالفو الوصيّة د الله وهكذا عاقبهم ب 70 عام د السبي، وهكذا أدّى نبوخذنصر منهم الشباب الي واعيين وقاريين، فحال "دانيال"، "شدرخ"، "ميشح" و "عبدنغو".

و في واحد النهار طاحت على الملك نبوخذنصر واحد الفكرة باش يعدّل واحد الصنام د الذهب يكون على الصورة ديالهُ الي يكون كبير بزّاف، باش الناس يعبدوه، وهكذا قال نالناس: "ملي تسمعو الموسيقى كاملين بكم خصّكم تسجدو نالصنام دياالي وأيّ واحد ماعمل شي هدّ الشّي عنسيّو في الفران د العافية."

بدات الموسيقى وكل الشّي سجّد له من غير واحد ثلاثة د ليهود، الي هم "شدرخ" و "ميشح" و "عبدنغو". وملي سمع الملك ديك الشّي تعصّب وعيظ لهم و هدّدهم و قال لهم: "إمّا تسجدو نالصنام دياالي ولاّ نحرقكم"، ولكن هم جاوبوه وقالو له: "الله الي كنعبدوه قادر ينجينا منك وحتى

من العافية ديالك، ويكون في علمك بلي حنا ماعمرنا
مانعبدو الصنام ديالك"، ديك الساعة تعصب الملك
بزاف وربطهم وسيبهم في الفران د العافية. شوية وهو
يشوف المعجزة د الله. قرب عندهم وهو مخلوع وقال
نالاتباع دياله: "كيفاش حنا سيبنا غير ثلاثة د الرجال
ودابا كنشوف أربعة، والرابع كيشبه نالولد د الإلهة".
قرب الملك نالفران وجبرهم ما فيهم والو. ديك الساعة
زاد تفاجأ وقرب أكثر وقال: "مبارك الله د "شدرخ"
و"ميشح" و "عبدنغو". هم وكلو أمرهم نالله دياهم وهو
صيفط لهم الملاك دياله باش ينقدهم وفضلو يتحرقو وما
يشركو شي بيه، من دبا نفوق أي واحد ما أحترم شي الله
ديالهم عنقتلو"، وفي ديك الساعة أعطى لهم الملك
منصب مهم معاه.

- ما كاينة حتى شي سبة آلي تخلينا نخرجو على
الطاعة د الله لا العافية ولا حتى الموت خصنا غير
نوكلو أمرنا نالله وهو أكيد عيحمينا.
- ما كاينشي شي واحد آلي قوي أكثر من الله وحي
يكون كيبان لينا قوي.
- في الوقت الصعب إذا تيقنا في الله، عاد عتبان لنا
العظمة دياله.

66:دانيال

دانيال 6

أختار الملك د بابل أبوخدنصر دانيال الّلي كان أدّاه مّلي أربح الحرب دياّله مع أورشليم باش يكون الوزير دياّله هو وجوج د الرجال آخرين ماشي ليهود .

دانيال كان واحد الراجل متّقّي الله و كياّمن بّلي كايّن غير الله واحد، وكيمشي في الطريق دياّله وشني ما عمل في حياّته كان كينجح له وهّد الشّي هو الّلي خلّي ديك الجوج د الرجال آخرين الّلي كان أدّاهم الملك معاه في الحرب يغيرو منه، على ديك الشّي مشاو عند الملك وطلبو منه باش يخرج شي قانون الّلي يمنع به ليهود باش يصلّيو نالّله دياّلهم. الملك سمع نالهدرة دياّلهم وعمل بها، وهكدا ولّي أي واحد جبروه ما كيعبد شي إله من غير الملك عيحكمو عليه بالموت ويخلّيو السبوعة تاكله.

وخّي سمع دانيال ديك الشّي بقى كيصلّي نالّله دياّله، وزاد كيصلّي له ثلاثة د المرّات في النهار و كيشكره على كل الشّي الّلي كي عمل في حياّته. مّلي شافوه ديك الرجال، رجعو عند الملك وقال له على كل الشّي ديك الساعة تعصّب الملك بزّاف وطلب منهم باش يطبّقو عليه القانون الجديد.

وهكدا أدّاو دانيال مسكين وأعملوه في واحد الحفرة مع السبوعة باش تاكله، مشى الملك في ديك الليلة وبات وهو

صايم، ولكن ما جاه شي النعاس مرّة، وفاق في الصباح بكري ومشي كيجري فاين كاين دانيال.
ملي وصل الملك قدام الموطع الي فيه دانيال عيط بواحد الصوت حزين وصقصاه: "دانيال يا عبد د الله الحي، واش الله دياك الي كتعبده ديماً واش قدر ينجيك من السبوعة؟" جاوب دانيال وقال: "يا الملك عيش ديماً الله دياي صيفط لي واحد الملاك وشدّ القم د السبوعة باش ما تحديني شي، حيت أنا برئ قدامه، وحتى قدامك حيت ماعملت والو".

فرح الملك بزاف ملي جبر بلي دانيال ما وقع له والو، وفي ديك الساعة خرّجه، وطلب من الخدامة دياهه باش يديو ديك الرجال في موطعه فاين كاينين السبوعة، وكتب الملك واحد الرسالة نالشعوب كاملة الي كيحكم فيها، باش يأمنو بالله د دانيال حيت هو الله الحي، الي كي عمل المعجزات، والي نجى دانيال من السبوعة.

- كاينين الناس الي كيخليو الشيطان يلعب بهم باش يأديو اللولاد د الله.

- عمّرنا مانخافو من الأعداء ديالنا، خصّنا نكونو قويين ونواجهوهم حيت الله معنا.

- ملي كنكونو واحد المتال مزيان نالله، هكدا كنخليو الناس يأمنو بيه، على ديك الشّي خصّنا نرودّو بالنّا.

67: الملكة أستير

أستير

"أستير" كانت واحد البنت ليهوديّة، ساكنة في بلاد فارس حيث الأجداد ديالها كانو تسباو نديك البلاد. من بعد ما ماتو واليديها ربّاهّا عمّا "موردخاي" الّلي كان عتق الملك د فارس من واحد الجوج د العسكر الّلي كانو اتّافقو باش يقتلوه و هكذا رجّعهُ الملك واحد من العسّاسة ديالهُ. و في ديك الوقت كان الملك كيفتش على شي بنت يتزوّج بها. أختار أستير من بين بزّاف د البنات حيث عجبّاهّ بزّاف، و تزوّج بها بلا مايعرف بّلي هي ليهودية . في واحد النهار شي راجل في الحكومة مسمّي "هامان"، عمل واحد الخطّة نالملك حتّى سنى على القانون باش يقتلو ليهود كاملين حيث كان كيكرهم، وما أكفاه شي هامان هدّ الشّي، لا، وجّد حتّى الموطع نمردخاي فاين يقتلُهُ، حيث رفض يسجدلُهُ.

ملّي ساق الخبر مورّدخاي بالحيلة الّلي عملها لهُ هامان مشى وقال لها نأستير. في الأول تردّدت بزّاف باش تهدر مع الملك ولكن من بعد خافت على الشعب ديالها، وبدأت كتصليّ نالّله، وصامت هي والشعب ديالها 3 أيام باش تقدر تصارح الملك بديك الشّي.

وملي كانت واجدة مشات عند الملك وهدرت معاه وهي عامرة بالتقّة د الله، وفي ديك الساعة الملك تعصّب على هامان و عيّط عليه، وأمر باش يتّقتل في الموطع الّلي كان

وَجَدَهُ نَمُورِدْخَاي. مِنْ بَعْدِ بَدَلِ الْمَلِكِ دِيكَ الْقَانُونِ وَبَدَى
كِيَعَاوَنَ لِيَهُود. وَهَكَذَا اللَّهُ أَسْتَعْمَلُ أَسْتِيرَ بَاشَ تَتَجَّى
الشَّعْبَ دِيَالَهُ.

- اللَّهُ كِيَخْتَارَنَا بَاشَ نَعْمَلُو الْخِدْمَةَ دِيَالَهُ حَيْثُ كِيَشُوفُ
قُلُوبَنَا شَنِ فِيهَا.

- إِذَا تَشَجَّعْنَا وَصَلَّيْنَا وَصُمْنَا نَالَهُ نَقْدُرُو نَعْمَلُو آلِي بَغِي
مَنَّا، وَخَى يَكُونُ كِيِيَانُ لِينَا مُسْتَحِيلٌ، حَيْثُ هُوَ مَعْنَا .

- الشَّيْطَانُ الْهَدَفُ دِيَالَهُ هُوَ يَبْعَدُ الْمُؤْمِنِينَ عَلَى اللَّهِ
وَلَكِنْ نَشْكُرُو اللَّهَ حَيْثُ هُوَ دَيِّمًا مَعْنَا وَكِيَحْفَظُنَا.

كِيَقُولُو آلِي حَفَرَ شَيْ حَفْرَةَ كِيَطِيحُ فِيهَا، نَرَدُّو .

بَالْنَا حَيْثُ اللَّهُ مَا كَتَخَفَى عَلَيْهِ حَتَّى حَاجَةً.